

# 北史


## 卷三之五



230

CHINESE - JAPANESE LIBRARY OF  
HARVARD - YENCHING INSTITUTE  
AT HARVARD UNIVERSITY  
JUL 30 1936

T 2455/21





北史卷三

魏本紀第三

塔佛大學漢和  
圖書館珍藏印

皇明朝列大夫國子監祭酒臣方從哲

承德郎右春坊右中允管國子監司業臣黃汝良等奉

勅重校刊

高祖

高祖孝文皇帝諱宏獻文皇帝之太子也母曰李夫人  
皇興元年八月戊申生於平城紫宮神光照室天地氛  
氳和氣充塞帝潔白有異姿襁褓岐嶷長而弘裕仁孝  
綽然有人君之表獻文尤愛異之三年六月辛未立爲  
皇太子五年受禪延興元年秋八月景午皇帝即位於



太華前殿改皇興五年爲延興丁未宋人來聘九月壬戌詔在位及人庶進直言壬午青州高陽人封辯聚黨自號齊王州軍討平之冬十月丁亥沃野統萬二鎮敕勒叛詔太尉隴西王源賀追擊至枹罕滅之徙其遺迸於冀定相三州爲營戶十二月乙酉封駙馬都尉穆亮爲趙郡王壬辰詔求舜後獲東萊人媯苟之復其家畢世以彰盛德之不朽復前濮陽王孔雀本封辛丑徙趙郡王穆亮爲長樂王癸卯日有蝕之

二年春正月大陽蠻酋桓誕率戶內屬拜征南將軍封襄陽王曲赦京師及河西南至秦涇西至枹罕北至涼

詔曰頃者淮徐未賓尼父廟隔非所致令祠典寢頓禮章殄滅遂使女巫妖覲淫進非禮自今有祭孔廟制用酒脯而已不聽婦女雜合以祈非望之福犯者以違制論其公家有事自如常禮蠕蠕犯塞太上皇帝次於北郊詔諸將討之虜遁走北部敕勒叛奔蠕蠕太上皇帝追至石磧不及而還三月戊辰以散騎常侍駙馬都尉萬安國爲大司馬大將軍封安城王庚午親耕籍田連川敕勒謀叛徙配青徐齊兗四州爲戶夏四月庚子詔工商雜伎盡聽赴農諸州課人益種菜果辛亥宋人來聘癸酉詔沙門不得去寺行者以公文是月宋明帝殂



五月丁巳詔軍警給璽印傳符次給馬印六月安州遭水雹詔丐租振恤景申詔今年貢舉尤爲猥濫自今所遣皆可門盡州郡之高才極鄉閭之選戊午行幸陰山秋七月壬寅詔州郡縣各遣二人才堪專對者赴九月講武當親問風俗八月百濟遣使請兵伐高麗九月辛巳車駕還宮戊申統萬鎮將河間王閻武皮坐貪殘賜死己酉詔以州鎮十一水旱丐其田租開倉振恤又詔流迸之人皆令還本違者徙邊冬十月蠕蠕犯塞及五原十一月太上皇帝親討之將度漠蠕蠕聞之北走數千里丁亥封皇叔略爲廣川王壬辰分遣使者巡省風

俗問人疾苦帝每月一朝崇光宮十二月庚戌詔曰頃者以來官以勞升未久而代牧守無恤人之心競爲聚斂送故迎新相屬於路非所以固人志隆政道也自今牧守溫良仁儉克已奉公者可久於其任歲積有成遷位一級其貪殘非道侵削黎庶者雖在官甫爾必加黜罰著之於令以爲彝準詔以代郡事同豐沛代人先配邊戍者免之是歲高麗地豆干庫莫奚高昌等國並遣使朝貢

三年春正月庚辰詔員外散騎常侍崔演使於宋丁亥改崇光宮爲寧光宮二月戊午太上皇帝至自北討飲



至策勲告于宗廟甲戌詔縣令能靜一縣劫盜者兼理  
二縣卽食其祿能靜二縣者三年遷爲郡守二千石能  
靜二郡上至三郡亦如之三年遷爲刺史三月壬午詔  
諸倉屯穀麥充積者出賜貧人夏四月戊申詔假司空  
上黨王長孫觀等討吐谷渾拾寅壬子詔以孔子二十  
八世孫魯郡孔乘爲崇聖大夫給十戶以供灑掃六月  
甲子詔曰往年縣召秀才二人問守宰善惡而賞者未  
幾罪者衆多肆法傷生情所未忍諸爲人所列者特原  
其罪盡可代之秋七月詔河南六州人戶收絹一匹綿  
一斤租三十石乙亥行幸陰山八月庚申帝從太上皇

一斤租三十石乙亥行幸陰山八月庚申帝從太上皇  
帝幸河西拾寅謝罪請降許之九月辛巳車駕還宮乙  
亥宋人來聘己亥駕曰今京師及天下囚未判在獄致  
死無近親者給衣衾棺槨葬之不得暴露辛丑詔遣十  
使循行州郡檢括戶口冬十月太上皇帝將南討詔州  
郡之人十丁取一充行戶五十石以備軍糧十一月戊  
寅詔以河南州郡牧守多不奉法致新邦百姓莫能上  
達遣使者觀風察獄黜陟幽明搜揚振恤癸巳上太皇  
帝南巡至懷州所過問人疾苦賜高年孝悌力田布帛  
十二月癸卯朔日有蝕之庚戌詔關外苑囿聽人樵採



是歲高麗契丹庫莫奚悉萬斤等國並遣使朝貢州鎮  
十一水旱丐人田租開倉振恤相州人餓死者二千八  
百四十五人祆人劉舉自稱天子齊州刺史武昌王平  
原捕斬之

四年春正月癸酉朔日有蝕之丁丑太尉隴西王源賀  
以病辭位二月甲辰太上皇帝至自南巡辛未禁寒食  
三月丁亥詔員外散騎常侍許赤武使於宋夏四月丁  
卯詔自今非謀反大逆干紀外奔罪止其身而已秋七  
月己卯曲赦仇池八月戊申大閱於北郊九月以宋亂  
故詔將軍元蘭等伐蜀漢冬十月庚子宋人來聘十一

月分遣侍臣循河南七州觀察風俗撫慰初附是歲粟  
特敕勒吐谷渾高麗曹利濶悉契丹庫莫奚地豆干等  
國並遣使朝貢州鎮十三大饑丐人田租開倉振之

五年春二月癸丑詔定考課明黜陟夏四月詔禁畜鷹  
鷄開相告之制五月景午詔員外散騎常侍許赤武使  
於宋丁未幸武州山辛酉幸車輪山六月庚午禁殺牛  
馬壬申曲赦京師死罪遣脩孺秋九月癸卯洛州人  
賈仲奴稱恒農王豫州人田智度稱上洛王郡討平之  
冬十月太上皇帝大閱於北郊十二月景寅改封建昌  
王長樂爲安樂王己丑城陽王長壽薨庚寅宋人來聘



是歲高麗吐谷渾龜茲契丹庫莫奚地豆于蠕七等國  
並遣使朝貢

承明元年春二月司空東郡王陸定國坐事免官爵為  
兵夏五月冀州人宋伏龍聚眾自稱南平王郡縣捕斬  
之六月甲子詔中外戒嚴分京師見兵為二等第一軍  
出遣第一兵二等亦如之辛未太上皇帝崩壬申大赦  
改元大司馬大將軍安城王萬安國坐法賜死戊寅以  
征西大將軍安樂王長樂為太尉尚書左僕射南平公  
目辰為司徒進封宜都王以南部尚書李訢為司空尊  
皇太后為太皇太后臨朝稱制秋七月甲辰追尊皇妣

羣公卿士有使人益國者具狀以聞甲戌以長安二蠶  
多死丐人歲賦之半九月丁亥曲赦京師冬十月丁巳  
起七寶永安行殿乙丑進假東陽王丕爵為王己未詔  
羣官卿士下及吏人各聽上書直言極諫勿有所隱諸  
有益政利人可以正風俗者有司以聞辛未幸建明佛  
寺大宥罪人進濟南公羅拔為王是歲蠕蠕高麗庫莫  
奚波斯契丹宕昌悉萬斤等國並遣使朝貢

太和元年春正月乙酉改元辛亥起太和安昌二殿己  
酉秦州略陽人王元壽聚眾自號衝天王雲中飢開倉  
振恤二月辛未秦益二州刺史武都公尉洛侯討破王



元壽三月庚子以雍州刺史東陽王丕爲司徒景午詔曰去年牛疫死傷大半今東作旣興人須肄業其敕在所督課田農有牛者加勤於常歲無牛者倍庸於餘年一夫制田四十畝中男二十畝無令人有餘力地有遺利夏四月樂安王良薨詔復前東郡王陸定國官爵五月車駕祈雨於武州山俄而澍雨大洽秋七月壬辰京兆王子推薨庚子定三等死刑己酉起朱明思賢門是月宋人殺其主丑八月壬子大赦景子詔曰工商皂隸各有厥分而有司縱濫或染清流自今戶內有工役者唯止本部丞已下準次而授若階藉元勲以勞定國者

唯止本部丞已下準次而授若階藉元勲以勞定國者不從此制戊寅宋人來聘九月乙酉詔羣臣定律令於太華殿庚子起永樂遊觀殿于北苑穿神泉池冬十月辛亥朔日有蝕之癸酉宴京邑耆老年七十以上于太華殿賜以衣服詔七十以上一子不從役宋葭蘆戍王楊文度遣弟鼠襲陷仇池十一月丁亥懷州人伊初苟自稱堯後應王聚衆于重山洛州刺史馮熙討平之閏月庚午詔負外散騎常侍李長仁使於宋十二月壬寅征西將軍皮喜攻陷葭蘆斬楊文度傳首京師丁未州郡八水旱蝗人饑詔開倉賑恤是歲高麗契丹庫莫奚



孀。車多羅西天竺舍衛疊伏羅栗楊婆員闍等國並遣使朝貢

二年春正月丁巳封昌黎王馮熙第二子始興爲北平王二月丁亥行幸代之湯泉所過問人疾苦以宮女賜貧人無妻者癸卯車駕還宮乙酉晦日有蝕之三月景子以河南公梁彌機爲宕昌王夏四月己丑宋人來聘京師旱甲辰祈天災于北苑親自禮焉減膳避正殿景午澍雨大洽曲赦京師五月詔曰迺者人漸奢尚婚葬越軌又皇族貴戚及士庶之家不惟氏族高下與非類婚偶先帝親發明詔爲之科禁而百姓習常仍不肅改

朕念憲章舊典永爲定準犯者以違制論六月庚子皇叔若薨秋八月分遣使者考察守宰問人疾苦景戌詔罷諸州禽獸之貢九月乙巳朔日有蝕之景辰曲赦京師冬十月壬辰詔員外散騎常侍鄭發使于宋十二月癸巳誅南郡王李惠是歲龜茲國獻名馳龍馬珍寶甚衆吐谷渾蠕。勿吉等國並遣使朝貴州鎮平十餘水旱人饑詔開倉賑恤

三年春正月癸丑以德六合殿成庚申詔罷行察官二月辛巳帝太皇太后幸代郡湯泉問人疾苦鰥寡貧者妻以宮女己亥還宮三月癸卯朔日有蝕之甲辰曲赦



京師夏四月壬申宋人來聘癸未樂良王樂平薨甲午  
宋順帝禪位於齊庚子進淮陽公尉元爵爲王宜都王  
目辰有罪賜死五月丁巳帝祈雨於北苑閉陽門是日  
澍雨大洽六月辛未以雍州人饑開倉振恤起文石室  
靈泉殿於方山秋七月壬寅詔免宮人年老及病者八  
月壬申詔羣臣進直言乙亥幸方山起思遠佛寺丁丑  
還宮九月壬子以司徒東陽王丕爲太尉趙郡公陳建  
爲司徒進爵魏郡王河南公苟頽爲司空進爵河東王  
進太原公王叡中山王隴東公張祐新平王乙未定州  
刺史安樂王長樂有罪賜死庚申隴西王源賀薨冬十  
假王督二將出淮陰隴西公元琛三將出廣陵河東公  
薛豹子三將出廣固至壽春是歲吐谷渾高麗蠕蠕地  
豆干契丹庫莫奚龜茲粟特州逸河龔疊伏羅員闍悉  
萬斤等國各遣使朝貢

四年春正月癸卯乾象六合殿成乙卯廣川王略薨丁  
巳罷畜鷹鷄之所以其地爲報德佛寺戊午襄城王韓  
頽有罪削爵徙邊二月癸巳以旱故詔天下祀山川羣  
神及能興雲雨者修飾祠堂薦以牲璧人有疾苦所在  
存問夏四月乙卯幸廷尉籍坊二獄引見諸囚詔隨輕  
重決遣以赴耕耘甲申賜天下貧人一戶之內無雜財



穀帛者稟一年六月丁卯以澍雨大洽曲赦京師秋七月辛亥行幸太山壬子詔會京師耆老賜錦綵衣服几杖稻米蜜麪復家人不徭役閏月丁亥幸獸園親錄囚徒輕者皆免之壬辰頓丘王李鍾葵有罪賜死八月乙酉詔諸州置冰室九月乙亥思義殿成壬午東明觀成戊子詔曰隆寒雪降可遣侍臣詣廷尉獄及囚所察飢寒者給以衣食桎梏者代以輕鎖是歲郡鎮十八水旱人飢詔開倉振恤蠕蠕悉萬斤等國並遣使朝貢五年春正月己卯南巡丁亥至中山親見高年問人疾苦二月辛卯朔大赦賜孝悌力田孤貧不能自存者穀

帛各有差免宮人之老者還其親丁酉至信都存問如中山癸卯還中山己酉講武于唐水之陽庚戌車駕還宮沙門法秀謀反伏誅假梁郡王嘉大破齊俘獲三萬餘口送京師三月辛酉朔幸肆州癸亥講武于雲水之陽所經考察守宰黜陟之己巳車駕還宮詔曰法秀妖詐亂常妄說符瑞蘭臺御史張求等一百餘人招結奴隸謀爲大逆有司科以族誅誠合刑憲但矜愚重命猶所不忍其五族者降止同祖三族止一門門誅止身夏四月己亥行幸方山建永固石室於山立碑焉銘太皇太后終制于金冊又起鑿玄殿甲寅以旱故詔所在掩



骸骨祈禱神祇任城王靈薨五月庚申以農月時要詔  
天下勿使有留獄六月甲辰中山王獻薨戊午封皇叔  
簡爲齊郡王猛爲安豐王秋七月庚申朔日有蝕之甲  
子齊人來聘九月庚午閱武於南郊大饗羣臣齊使車  
僧朗以班在宋使殷靈誕後辭不就席宋降人解奉君  
刃僧朗於會中詔誅奉君等己亥封昌黎王馮熙世子  
誕爲南平王冬十二月癸巳州鎮十二飢詔開倉振恤  
是歲鄧至蠕蠕等國並遣使朝貢

六年春正月甲戌大赦二月辛卯詔以靈丘郡土旣徧  
墾又諸州路衝復其人租十五年癸巳白蘭王吐谷渾

翼世以誣罔伏誅乙未詔曰蕭道成逆亂江淮戈旗頻  
舉七州之人旣有征運之勞深乖輕徭之義其復常調  
三年癸丑賜王公已下清勤著稱者穀帛有差三月庚  
辰幸獸圈詔曰武狼猛暴食肉殘生從今勿復捕貢辛  
巳幸武州山石窟寺賜貧老衣服是月齊高帝殂夏四  
月甲辰賜畿內鰥寡孤獨不能自存者粟帛各有差秋  
七月發州郡五萬人修靈丘道八月癸未朔分遣大使  
巡行天下遭水之處丐其租賦貧儉不自存者賜以粟  
帛庚子罷山澤禁九月辛酉以氐楊後起爲武都王是  
歲地豆干吐谷渾等國並遣使朝貢



七年春正月庚申詔曰朕每思知百姓疾苦以增修寬政故具問守宰苛虐之狀於州郡使者今秀孝計掾對多不實甚乖朕虛求之意宜案以大辟明罔上必誅然情猶未忍可恕罪聽歸申下天下使知後犯無恕丁卯詔青齊光東徐四州戶運倉粟一十萬石送瑕丘琅邪復租竿一年三月甲戌以冀定二州飢詔郡縣爲粥於路以食之又弛關津之禁夏四月庚子幸崞山賜所過鰥寡不能自存者衣服粟帛壬寅車駕還宮閏月癸丑皇子生大赦六月定州上言爲粥所活九十四萬七千餘口秋七月甲申詔假員外散騎常侍李彪使於齊改

皇子生大赦六月定州上言爲粥所活九十四萬七千餘口秋七月甲申詔假員外散騎常侍李彪使于齊改封濟南王羅拔爲趙郡王九月壬寅詔求讜言冀州上言爲粥所活七十五萬一千七百餘口冬十月戊午皇信堂成十一月辛丑齊人來聘十二月乙巳朔日有蝕之癸丑詔曰夏殷不嫌一族之婚周世始絕同姓之娶斯皆教隨時設政因事改者也皇運初基日不暇給古風遺樸未遑釐改自今悉禁絕之有犯者以不道論庚午開林慮山禁與人共之州鎮十三饑詔開倉振恤八年春正月詔隴西公琛尚書陸叡爲東西二道大使



褒善罰惡夏五月己卯詔振賜河南七州戍兵甲申詔  
員外散騎常侍李彪使于齊六月丁卯詔曰置官班錄  
行之尚矣自中原喪亂茲制中絕先朝因循未遑釐改  
朕顧憲章舊典始班俸祿罷諸商人以簡人事戶增調  
三匹穀二斛九升以為官司之祿均預調為二匹之賦  
卽兼商用雖有一時之煩終克永逸之益祿行之後賦  
滿一匹者死變法改度宜為更始其大赦天下與之惟  
新戊辰武州水壞人居秋八月甲辰詔以班制俸祿更  
興刑書寬猛未允人或異議制百辟卿士工商吏人各  
上便宜勿有所隱九月甲午齊人來聘戊戌詔俸十月

為首每季一請於是內外百官受祿有差冬十一月乙  
未詔負外散騎常侍李彪使於齊十二月州鎮十五水  
旱人饑詔使者開倉振恤是歲蠕<sub>匕</sub>國麗等國各遣使  
朝貢

九年春正月戊寅詔禁圖讖祕緯及名孔子閉房記留  
者以大辟論又諸巫覡假稱神鬼妄說吉凶及委巷諸  
非墳典所載者嚴加禁斷癸未大饗羣臣于太華殿班  
賜皇誥二月己亥大制皇子封王者皇孫皇曾孫紹封  
者皇女封者歲祿各有差封廣陽王建第二子嘉為廣  
陽王乙巳詔百辟卿士工商吏人各上書極諫靡有所



隱三月景申封皇弟禧為咸陽王幹為河南王羽為廣陵王雍為潁川王勰為始平王詳為北海王夏五月齊人來聘秋七月景午朔新作諸門癸未遣使拜宕昌王梁彌機兄子彌承為宕昌王八月庚申詔曰數州災水饑饉薦臻民有賣鬻男女者天譴在予一人百姓橫罹艱毒今自太和六年已來買定冀幽相四州饑人良口者盡還所親雖娉為妻妾遇之非理情不樂者亦離之冬十月丁未詔使者循行州郡與牧守均給天下之田還受以生死為斷勸課農桑興富人之本辛酉司徒魏郡王陳建薨詔負外散騎常侍李彪使於齊十二月乙

初立黨里隣三長定人戶籍三月庚戌齊人來聘夏四月辛酉朔始制五等公服甲子帝初法服御輦祀西郊六月己卯名皇子曰恂大赦秋八月乙亥給尚書五等品爵已上朱衣王珮大小組綬九月辛卯詔起明堂辟雍冬十月癸酉有司議依故事配始祖於南郊十一月議定州郡縣官依口給俸十二月乙酉汝南潁川飢詔丐人田租開倉振恤是歲蠕蠕高麗吐谷渾勿吉等國並遣使朝貢

十一年春正月丁亥朔詔定樂章非雅者除之二月甲子肆州之鴈門及代郡人飢詔開倉振恤夏五月癸巳



南平王渾薨甲午詔復七廟子孫及外戚總服己上賦  
使無所與六月辛巳秦州人飢詔開倉振恤秋七月己  
丑詔今年穀不登聽人出關就食遣使者造籍分遣去  
留所在開倉振恤八月壬申蠕蠕犯塞遣平原王陸獻  
討之庚辰大議北伐辛巳罷山北苑以其地賜貧人冬  
十月辛未詔罷起部無益之作出宮人不執機杼者甲  
戌詔曰鄉飲之禮廢則長幼之序亂孟冬十月人閑歲  
隙宜於此時導以德義可下諸州黨里之內推賢而長  
者教其里人父慈子孝兄友弟順夫和妻柔不率長教  
者具以名聞十一月丁未詔罷尚方錦繡綾羅之工百

姓欲造任之無禁其御府衣服金銀珠玉綾紬錦太官  
雜器太僕乘具內庫弓矢出其大半班賚百官及京師  
人庶下至工商皂隸逮於六鎮戍士各有差戊申詔今  
寒氣勁切杖箠難任自今月至來年孟夏不聽拷問罪  
人又歲飢輕囚宜速決了無令薄罪久留獄犴十二月  
詔祕書丞李彪著作郎崔光改析國記依紀傳體是歲  
大飢詔所在開倉振恤吐谷渾高麗悉萬斤等國並遣  
使朝貢

十二年春正月辛巳朔初建五牛旌旗乙未詔鎮戍流  
徙之人年滿七十孤單窮獨無成人子孫旁無耆親者



具狀以聞二月辛亥朔日有蝕之三月丁亥中散梁衆  
保等謀反伏誅夏四月甲子大赦己巳齊將陳顯達攻  
陷澧陽長樂王穆亮率騎討之五月丁酉詔六鎮雲中  
河西及關內郡各修水田通渠溉灌壬寅增置彝器於  
太廟秋九月甲午詔曰日蝕脩德月蝕修刑廼者癸巳  
夜月蝕盡公卿已下宜慎刑罰以答天意丁酉起宣文  
堂經武殿癸卯淮南王他薨冬閏十月甲子帝觀築圓  
丘于南郊十一月雍豫二州人飢詔開倉振恤梁州刺  
史臨淮王提坐貪縱配北鎮是歲高麗宕昌吐谷渾勿  
吉武興等國並遣使朝貢

十三年春正月辛亥祀圓丘初備大駕乙丑兗州人王  
伯恭聚衆勞山自稱齊王東萊鎮將孔伯孫討斬之戊  
辰齊人寇邊淮南太守王僧雋擊走之二月庚子引羣  
臣訪政道得失損益之宜三月夏州刺史章武王彬以  
貪財削封夏四月丁丑詔曰升樓散物以賚百姓至使  
人馬騰踐多有毀傷今可斷之以本所費之物賜窮老  
貧獨者州鎮十五大飢詔所在開倉振恤五月庚戌祀  
方澤六月汝陰王天賜南安王禎並坐贓賄免爲庶人  
秋七月立孔子廟於京師八月乙亥詔兼員外散騎常  
侍邢產使于齊九月出宮人賜北鎮人貧鰥者冬十一



月己未安豐王猛薨十二月景子司空河東王苟頽薨  
甲午齊人來聘己亥以尚書令尉元爲司徒左僕射穆  
亮爲司空是歲高麗吐谷渾陰平中赤武興宕昌等國  
各遣使朝貢

十四年春正月己巳朔日有蝕之三月戊寅初詔定起  
居注制詔遣侍臣巡行州郡問人疾苦夏四月地豆干  
頻犯塞甲戌征西大將軍陽平王熙擊走之甲午詔兼  
員外散騎常侍邢產使于齊五月己酉庫莫奚犯塞安  
州都將樓龍兒擊走之沙門司馬御惠自言聖王謀破  
平原郡禽獲伏誅秋七月甲辰詔罷都牧雜制八月詔

議國之行次九月癸丑太皇太后馮氏崩詔聽藩鎮會  
經內侍者前後奔赴冬十月戊辰詔將親侍龍輿奉訣  
陵隧諸常從之具悉可停之其武衛之官防侍如法癸  
酉葬文明太皇太后於永固陵甲戌車駕謁永固陵羣  
臣固請公除帝不許己卯車駕謁永固陵庚辰帝居廬  
引見羣寮於太和殿太尉東陽王丕等據權制固請帝  
引古禮往復羣臣乃止京兆王太興有罪免官削爵詔  
曰公卿屢依金冊遺旨中代權制式請過葬卽吉朕恩  
遵遠古終三年之制依禮旣虞卒哭此月二十一日授  
服以葛易麻旣以衰服在上公卿不得獨釋於下故於



朕之授服變從練禮已下復爲節降斟酌古今以制厥  
衷且取遺旨速除之一端粗申臣子罔極之巨痛癸未  
詔曰朕遠遵古式欲終三年之禮百辟羣臣據金冊顧  
命將奪朕心從先朝之制朕仰惟金冊俯自推省取諸  
二衷不許衆議以衰服過期終四節之慕又奉遵聖訓  
聿脩誥旨不敢暗默自居以曠機政庶不慙遺令之意  
差展哀慕之情並下州鎮長至三元絕告慶之禮甲申  
車駕謁永固陵十一月甲寅詔內外職人先朝班次及  
諸方雜客冬至之日盡聽入臨三品已下衰服者至夕  
復臨其餘唯旦臨而已其拜哭之節一依別儀丁巳齊

人來聘十二月壬午詔依準丘井之式遣使與州郡宣  
行條制隱口漏丁卽聽附實若朋附豪勢陵抑孤獨罪  
有常刑是歲吐谷渾宕昌武興陰平高麗等國並遣使  
朝貢

十五年春正月丁巳帝始聽政於皇信東室初分置左  
右史官癸亥晦日有蝕之二月己丑齊人來聘三月甲  
辰車駕謁永固陵夏四月癸亥帝始進蔬食乙丑謁永  
固陵自正月不雨至于癸酉有司奏祈百神詔曰何宜  
四氣未周使行禮事唯當考躬責已以待天譴甲戌詔  
員外散騎常侍李彪使于齊己卯經始明堂改營太廟



五月己亥議改律令於東明觀折疑獄乙卯袍罕鎮將  
長孫百年攻吐谷渾所置洮陽泥和二戍剋之俘獲三  
萬餘人詔悉免歸景辰詔造五輅六月丁未濟陰王鬱  
以貪殘賜死秋七月乙丑謁永固陵規建壽陵己卯詔  
議祖宗以道武皇帝爲太祖乙酉車駕巡省京邑聽訟  
而還八月壬辰議養老又議肆類上帝禋于六宗禮帝  
親臨決詔郡國有時物可以薦宗廟者貢之戊戌移道  
壇於桑乾之陰改曰崇虛寺己亥詔諸州舉秀才先盡  
才學乙巳親定禘祫禮丁巳議律令事仍省雜祀九月  
辛巳齊人來聘冬十月庚寅車駕謁永固陵是月明堂

太廟成十一月丁卯遷七廟神主於新廟乙亥大定官  
品戊寅考諸牧守詔假通直散騎常侍李彪聘於齊景  
戌初罷小歲賀丁亥詔二千石考上上者假四品將軍  
賜乘黃馬一匹上中者五品將軍上下者衣一襲十二  
月壬辰遷社於內城之西癸巳班賜刺史已下衣冠以  
安定王休爲太傅齊郡王簡爲太保帝爲高麗王璉舉  
哀於城東行宮己酉車駕迎春於東郊辛卯詔簡選樂  
官是歲吐谷渾悉萬斤高麗鄧至宕昌等國並遣使朝  
貢

十六年春正月戊午朔朝饗羣臣於太華殿帝始爲王



公興縣而不樂已未宗祀顯祖獻文皇帝於明堂以配上帝遂升臺以觀雲物降居青陽左个布政事每朔依以爲常辛酉始以太祖配南郊壬戌詔定行次以水承金甲子詔罷袒裸乙丑制諸遠屬非太祖子孫及異姓爲王者皆降爲公公爲侯侯爲伯子男仍舊皆除將軍之號戊辰帝臨思義殿策問秀孝景子始以孟月祭廟二月戊子帝移御永樂宮庚寅壞太華殿經始太極殿辛卯罷寒食享壬辰辛北部曹歷觀諸省巡省京邑聽理寃訟甲午車駕初朝日于東郊遂以爲常丁酉詔祀唐堯於平陽虞舜於廣寧夏禹於安邑周文於洛陽丁

未改諡宣尼曰文聖尼父告諡孔廟三月丁卯巡省京邑癸酉省西郊郊天雜事乙亥車駕初迎氣於南郊自此爲常辛巳以高麗王璉孫雲爲其國王齊人來聘夏四月丁亥朔頒新律令大赦甲寅幸皇宗學親問博士經義五月癸未詔羣臣於皇信堂更定律條流徒限制帝親臨決之秋七月壬戌詔曰自今選舉每以季月本曹與吏部銓簡甲戌詔兼員外散騎常侍宋弁使於齊八月庚寅車駕初祀夕月於西郊遂以爲常乙未詔陽平王頤左僕射陸叡督十二將北討蠕蠕景午宕昌王梁彌承來朝司徒尉元以老遜位己酉以尉元爲三老



游明根爲五更又養國老庶老將行大射之禮雨不克  
成癸丑詔曰國家雖宗文以懷九服修武以寧八荒然  
於習武之方猶爲未盡將於馬射之前先行講武之式  
可敕有司豫修場埒其列陣之儀五戎之數別俟後敕  
九月甲寅朔大序昭穆於明堂祀文明太皇太后於玄  
堂辛未帝以文明太皇太后再周忌日哭於陵左絕膳  
三日哭不輟聲辛巳武興王楊集始來朝冬十月己亥  
以太傅安定王休爲大司馬特進馮誕爲司徒甲辰詔  
以功臣配饗太廟庚戌太極殿成饗羣臣十一月乙卯  
依古六寢權制二室以安昌殿爲內寢皇信堂爲中寢

四下爲外寢十二月賜京邑老人鳩杖齊人來聘是歲  
高麗鄧至契丹齧吐谷渾等國並遣使朝貢

十七年春正月壬子朔饗百寮於太極殿乙丑詔大賜  
諸蕃君長車旗衣馬錦綵繒纈多者一千少者三百各  
以命數爲差詔兼員外散騎常侍邢巒使於齊景子以  
吐谷渾伏連壽爲其國王庚辰蠲大司馬安定王休太  
保齊郡王簡朔望之朝二月乙酉詔賜議律令之官各  
有差已酉車駕始藉田於都南三月戊辰改作後宮夏  
四月戊戌立皇后馮氏是月齊直閭將軍蠻曾田益宗  
率部落內屬五月壬戌宴四廟子孫於宣文堂帝親與



之齒行家人禮甲子帝臨朝堂引見公卿以下決疑政錄囚徒丁丑以旱徹膳襄陽蠻酋雷婆恩等率其部內徙居於太和川六月庚辰朔日有蝕之景戊帝將南伐詔造河橋乙未講武乙巳詔曰此百秩雖陳事典未叙自八元樹位躬加省覽作職員令二十一卷事迫戎期未善周悉須待軍回更論所闕權可付外施行立皇子恂爲皇太子秋七月癸丑以皇太子立詔賜人爲父後者爵一級爲公士曾爲吏屬者爵二級爲上造鰥寡孤獨不能自存者人粟五斛戊午中外戒嚴是月齊武帝殂八月乙酉三老山陽郡公尉元薨景戊車駕類於上

帝遂臨尉元喪丁亥帝辭永固陵巳丑發京師南伐步騎三十餘萬太尉丕奏請以宮人從詔以臨戎不語內事不許壬寅車駕至肆州人年七十以上賜爵一級路見眇跛停駕親問賜衣食復終身戊申幸并州親見高年問疾苦九月壬子詔兼員外散騎常侍高聰聘於齊丁巳詔車駕所經傷人秋稼者畝給穀五斛戊辰濟河詔洛懷并肆所過四州賜高年爵恤鰥寡孤獨各有差孝悌廉義文武應求者皆以名聞又詔廝養戶不得與庶士婚有文武之才積勞應進者同庶族例聽之庚午幸洛陽周巡故宮基跡帝顧謂侍臣曰晉德不修荒毀



至此遂詠黍離詩爲之流涕壬申觀河橋幸太學觀石  
經景子六軍發軔丁丑帝戎服執鞭御馬而出羣臣稽  
顙於馬前請停南伐帝乃止仍議遷都計冬十月戊寅  
朔幸金墉城詔徵司空穆亮與尚書李沖將作大匠董  
爵經始洛京巳卯幸河南城乙酉幸豫州癸巳次於石  
濟乙未解嚴設壇於滑臺宮詔京師及諸州從戎者賜  
爵一級應募者加二級主將加三級癸卯幸鄴城乙巳  
詔安定王休率從官迎家口於代車駕送於漳水上初  
帝之南伐起宮殿於鄴西十一月癸亥宮成徙御焉十  
二月戊寅巡省六軍乙未詔隱恤軍士死亡疾病務令  
優給是歲勿吉吐谷渾宕昌陰平契丹庫莫奚高麗鄧  
至等國並遣使朝貢

十八年春正月丁未朔朝羣臣於鄴宮澄鸞殿癸亥南  
巡詔相兗豫三州賜高年爵恤鰥寡孤老各有差孝悌  
廉義文武應求者皆以名聞戊辰經殷北干墓祭以大  
牢乙亥幸洛陽西宮二月巳丑行幸河陰規建方澤之  
所景申徙封河南王幹爲趙郡王潁川王雍爲高陽王  
壬寅北巡癸卯齊人來聘甲辰詔喻天下以遷都意閏  
月癸亥次勾注陘南皇太子朝于蒲地壬申至平城宮  
癸酉臨朝堂部分遷留甲戌謁永固陵三月庚辰罷西



郊祭天壬辰帝臨太極殿諭在代羣臣遷移之略夏五月甲戌朔日有蝕之乙亥詔罷五月五日七月七日饗六月己巳詔兼員外散騎常侍盧昶使於齊秋七月乙亥以宋王劉昶爲大將軍壬辰北巡戊戌謁金陵辛丑幸朔州是月齊蕭鸞殺其主昭業八月癸亥皇太子朝於行宮甲辰行幸陰山觀雲川丁未幸閱武臺臨觀講武因幸懷朔武川撫冥柔玄等四鎮乙丑南還所過皆親見高年問人疾苦貧窘孤老者賜以粟帛景寅詔六鎮及禦夷城人年老孤貧廢疾者賜粟宥罪各有差戊辰車駕次旋鴻池庚午謁朮固陵辛未還平城宮九月

壬申朔詔曰三載考績自古通經三考黜陟以彰能否朕今三載一考考卽黜陟欲令愚滯無妨於賢者才能不擁於下位各令當曹考其優劣爲三等六品以下尚書重問五品已上朕將親與公卿論其善惡上上者遷之下下者黜之中中者守其本任壬午帝臨朝堂親加黜陟壬辰陰平王陽炅來朝冬十月甲辰以太尉東陽王丕爲太傅戊申親告太廟奉迎神主辛亥車駕發平城宮壬戌次於中山之唐湖乙丑分遣侍臣巡問疾苦己巳幸信都庚午詔曰比聞緣邊之蠻多有竊掠致有父子乖離室家分絕可詔荆郢東荆三州勒諸蠻人勿



有侵暴是月齊蕭鸞殺其主昭文而自立十一月辛未朔詔冀定二州賜高年爵恤鰥寡孤老各有差孝義廉貞文武應求者具以名聞丁丑幸鄴甲申經比干墓親爲吊文樹碑刊之己丑車駕至洛陽十二月辛丑朔分命諸將南征壬寅革衣服之制癸卯詔中外戒嚴戊申復代遷戶租賦三歲己酉詔王公伯子男開國食邑者王食半公三分食一侯伯四分食一子男五分食一辛亥車駕南伐丁卯詔郢豫二州賜高年爵恤孤寡鰥老各有差緣路之丁復田租一歲孝悌廉貞文武應求者具以名聞戊辰車駕至懸瓠己巳詔壽陽鍾離馬頭之

師所獲男女口皆放還南是歲高麗國遣使朝貢

十九年春正月辛未朔朝饗羣臣於懸瓠癸酉詔禁淮北人不得侵掠犯者以大辟論壬午講武於汝水西大賚六軍平南將軍王肅左將軍元麗並大破齊軍己亥車駕濟淮二月甲辰幸八公山路中雨甚詔去蓋見軍士病者親隱恤之戊申車駕巡淮南東人皆安堵租運屬路景辰幸鍾離戊午軍士禽齊人三千帝曰在君爲君其人何罪於是免歸辛酉發鍾離將臨江水司徒馮誕薨壬戌詔班師丁卯遣使臨江數齊主罪惡三月戊子太師馮熙薨夏四月丁未曲赦徐豫二州其運轉之



士復租三年辛亥詔賜高年爵恤孤寡老疾各有差德  
著丘園者具以名聞齊人降者給復十五年癸丑幸小  
沛使以太牢祭漢高祖廟己未幸瑕丘使以太牢祠岱  
嶽詔宿衛武官增位一級庚申幸魯城親祠孔子廟辛  
酉詔拜孔氏四人顏氏二人爲官詔兗州刺史舉部內  
士人堪軍國及守宰政績者具以名聞詔賜兗州人爵  
及粟帛如徐州又詔選諸孔宗子一人封崇聖侯邑一  
百戶以奉孔子祀命兗州爲孔子起園柏修飾墳隴更  
建碑銘褒揚聖德戊辰行幸碣磬太和廟成五月己巳  
城陽王鸞赭陽失利降爲定襄縣王廣川王諧薨庚午

遷文成皇后馮氏神主於太和廟甲戌行幸滑臺景子  
次于石濟庚辰皇太子朝於平桃城癸未車駕至自南  
伐甲申減閑官祿以裨軍國之用乙酉行飲至禮班賜  
各有差甲午皇太子冠於廟六日己亥詔不得以北俗  
之語言於朝廷違者免所居官辛丑詔復軍士從駕渡  
淮者租賦三年癸卯詔皇太子赴平城宮壬子詔濟州  
東郡滎陽及河南諸縣車駕所經者賜高年爵恤孤寡  
老疾各有差孝悌廉義文武應求者具以名聞癸丑求  
天下遺書秘閣所無有裨時用者加以厚賞乙卯曲赦  
梁州復人田租三歲景辰詔遷洛人死葬河南不得還



北於是代人南遷者悉爲河南洛陽人戊午詔改長赤  
大斗依周禮制度班之天下秋八月辛酉宮路見壞塚  
露棺駐輦埋之乙巳詔選天下勇士十五萬人爲羽林  
武賁以充宿衛丁巳詔諸從兵從征被傷者皆聽還本  
金墉宮成甲子引羣臣歷宴殿堂九月六宮及文武盡  
遷洛陽景戌行幸鄴丁亥詔諸墓舊銘記見存昭然爲  
時人所知者三公及位從公者去墓三十步尚書令僕  
九列十五步黃門五校十步各不聽墾殖壬辰遣黃門  
郎以太牢祭比干墓乙未車駕還宮冬十月甲辰曲赦  
相州賜高年爵恤孤老痼疾各有差景辰車駕至自鄴

辛酉詔州郡舉士壬戌詔諸州牧考屬官爲三等之科  
以聞將加親覽以定升降詔徐充光南青荆洛六州嚴  
纂戎備應須赴集十一月行幸委粟山議定圓丘甲申  
祀圓丘景戌大赦十二月乙未朔引見羣臣光極堂宣  
下品令爲大選之始辛酉以咸陽王禧爲長兼太尉復  
前安南王禎本爵甲子引見羣臣光極堂班賜冠服是  
歲高麗鄧至吐谷渾等國各遣使朝貢

二十年春正月丁卯詔改姓元氏壬辰封始平王勰爲  
彭城王復封定襄王鸞爲城陽王二月辛丑幸華林聽  
訟於都亭壬寅詔自非金革皆聽終三年喪景午詔畿



內七十已上暮春赴京師將行養老禮庚戌幸華林聽  
訟於都亭癸丑詔介山之邑聽爲寒食自餘禁斷三月  
景寅宴羣臣及國老庶老於華林園詔國老黃耆以上  
假中散大夫郡守耆年以上假給事中縣令庶老直假  
郡縣各賜鳩杖衣裳丁丑詔諸州中正各舉其鄉人望  
年五十已上守素衡門者授以令長夏五月景子詔敦  
勸農功令畿內嚴加課督墮業者申以楚撻力田者具  
以名聞景戌初營方澤於河陰遣使以太牢祭漢光武  
及明章三帝陵又詔漢魏晉諸帝陵各禁方百步不得  
樵蘇踐藉丁亥祀方澤秋七月廢皇后馮氏戊寅帝以

久旱咸秩羣神自癸未不食至于乙酉是夜澍雨大洽  
八月壬辰朔幸華林園親錄囚徒咸降本罪二等決遣  
之丁巳南安王禎薨幸華林園聽訟九月戊辰車駕閱  
武于小平津癸酉還宮丁亥將通洛水入穀帝親臨觀  
庚寅晦日有蝕之冬十月戊戌以代遷之士皆爲羽林  
武賁司州之人十二夫調一吏爲四年更卒歲開番假  
以供公私力役巳酉曲赦京師十一月乙酉復封前汝  
陰王天賜孫景和爲汝陰王前京兆王大興爲西河王  
十二月甲子以西北州郡旱儉遣侍臣巡察開倉振恤  
乙丑開鹽池禁景寅廢皇太子恂爲庶人戊辰置常平



倉樂陵王思譽知恒州刺史穆泰謀反不告削爵爲庶人

二十一年春正月景申立皇子恪爲皇太子賜天下爲父後者爵一級己亥遣侍臣巡方省察問人疾苦黜陟守宰乙巳北巡二月壬戌次於大原親見高年問所不便乙丑詔并州士人年六十已上假以郡守先是定州人王金鈞訛言自稱應王景寅州郡捕斬之癸酉車駕至平城甲戌謁永固陵乙未南巡甲寅詔汾州賜高年爵各有差景辰次平陽使以太牢祭唐堯夏四月庚申幸龍門使以太牢祭夏禹癸亥幸蒲坂使以太牢祭虞

舜修堯舜夏禹廟辛未幸長安壬申武興王楊集始來朝乙亥親見高年問所疾苦景子遣侍臣分省縣邑振賜穀帛戊寅幸未央殿阿房宮遂幸昆明池癸未宋王劉昶薨景戌使以太牢祀漢帝諸陵五月丁亥朔衛大國遣使朝貢己丑車駕東旋汎渭入河庚寅詔雍州士人百年以上假華郡太守九十以上假荒郡八十已上假華縣七十以上假荒縣庶老以年各減一等七十已上賜爵三級其營船夫賜爵一級孤寡鰥貧各賜穀帛其孝友德義文武才幹悉仰貢舉壬辰使以太牢祭周文王於鄠祭周武王於鎬癸卯遣使祭華岳六月庚申



車駕至自長安壬戌詔冀定瀛相濟五州發卒士二十萬將以南討癸亥司空穆亮遜位秋七月甲午立昭儀馮氏爲皇后甲寅帝親爲羣臣講喪服於清徽堂八月景辰詔中外戒嚴壬戌立皇子愉爲京兆王懌爲清河王懷爲廣平王戊辰講武於華林園庚辰車駕南討九月景申詔司州洛陽人年七十以上無子孫六十以上無暮親貧不自存者給以衣食及不滿六十而有廢痼之疾無大功親窮困無以自療者皆於別坊遣醫救護給大鑿師四人豫請藥物療之辛丑帝留諸將攻赭陽引師南討丁未車駕發南陽留太尉咸陽王禧前將軍

元英攻之巳酉車駕至新野冬十月丁巳四面進攻不尅詔左右軍築長圍以守之乙亥追廢貞皇后林氏爲庶人十一月丁酉大破齊軍於沔北於是人皆復業九十以上假以郡守六十五以上假以縣令十二月丁卯詔流徒之囚皆勿決遣登城之際令其先鋒自効庚午車駕臨河遂東還戊寅還新野巳卯親行營壘恤六軍以齊郡王子琛紹河間王若後高昌國遣使朝貢二十二年春正月癸未朔饗羣臣於新野行宮丁亥拔新野斬其太守劉忌於宛庚午至自新野辛未詔以穰人首歸大順始終若一者給復三十年標其所居曰歸



義鄉次降者給復十五年三月壬午朔大破齊將崔惠  
景肅衍軍於鄧城庚寅行幸樊城觀兵襄沔耀武而還  
曲赦二荆魯陽辛亥行幸懸瓠夏四月趙郡王幹薨秋  
七月壬午詔后之私府損半六宮嬪御五服男女恒恤  
恒供亦令減半在戎之親三分省一以供賞是月齊明  
帝殂八月辛亥皇太子自京師來朝壬戌高麗國遣使  
朝貢九月己亥帝以禮不伐喪詔反師景午車駕發懸  
瓠冬十月己酉朔曲赦二豫州殊死已下復人田租一  
歲十一月辛巳幸鄴

二十三年春正月戊寅朔朝饗羣臣於鄴先是帝不豫

至是有瘳庚辰羣臣上壽大饗於澄鸞殿壬午幸西門  
豹祠遂歷漳水而還戊戌車駕至自鄴癸卯行飲至策  
勲之禮甲辰大赦太保齊郡王簡薨二月辛亥以長兼  
太尉咸陽王禧爲太尉癸亥以中軍大將軍彭城王勰  
爲司徒復樂陵王思譽本封癸酉齊將陳顯達攻陷馬  
圈戎三月庚辰車駕南伐癸未次梁城景戌帝不豫丁  
酉車駕至馬圈戊戌頻戰破之己亥收其戎資億計諸  
將追奔漢水斬獲及赴水死者十八九庚子帝疾甚車  
駕北次穀塘原甲辰詔賜皇后馮氏死詔司徒勰徵太  
子於魯陽踐阼以北海王詳爲司空王肅爲尚書令廣



陽王嘉爲左僕射尚書宋并爲吏部尚書與太尉咸陽王禧右僕射任城王澄等六人輔政夏四月景午朔帝崩于穀塘原之行宮時年三十三祕諱至魯陽發喪還京師上諡曰孝文皇帝廟曰高祖五月景申葬長陵帝幼有至性年四歲時獻文患癰帝親自吮膿五歲受禪悲泣不自勝獻文問其故對曰代親之感內切於心獻文甚歎異之文明太后以帝聰聖後或不利馮氏將謀廢帝乃於寒月單衣閉室絕食三朝召咸陽王禧將立之元丕穆泰李冲固諫乃止帝初不有憾唯深德丕等撫念諸弟始終曾無纖介惇睦九族禮敬俱深雖於大

臣持法不縱然性寬慈進食者曾以熱羹覆帝手又曾於食中得蟲穢物並笑而恕之宦者先有譖帝於太后太后杖帝數十帝默受不自申明太后崩後亦不以介意聽覽政事從善如流哀矜百姓恒思所以濟益天地五郊宗廟二分之禮常必躬親不以寒暑爲倦尚書奏案多自尋省百官大小無不留心務於周洽每言凡爲人君患於不均不能推誠遇物苟能均誠胡越之人亦可親如兄弟常從容謂史官曰直書時事無諱國惡人君威福自己史復不書將何所懼南北征巡有司奏請脩道帝曰粗修橋梁通輿馬便止不須去草剗令平也



凡所修造不得已而爲之不爲不急之事重損人力巡幸淮南如在內地軍事須伐人樹者必留絹以酬其直人苗稼無所傷踐諸有禁忌襍厭之方非典籍所載者一皆除罷雅好讀書手不釋卷五經之義覽之便講學不師受探其精奧史傳百家無不該涉善談莊老尤精釋義才藻富贍好爲文章詩賦銘頌在興而作有大文筆馬上口授及其成也不改一字自太和十年己後詔冊皆帝文也自餘文章百有餘篇愛竒好士情如飢渴待納朝賢隨才輕重常寄以布素之意悠然玄邁不以世務嬰心又少善射有膂力年十餘能以指彈碎羊髀骨射禽獸莫不隨行所至而斃之至十五便不復殺生射獵之事悉止性儉素常服澣濯之衣鞞勒鐵木而已帝之雅志皆此類也

論曰有魏始基代朔廓平南夏闢土經世咸以威武爲業文教之事所未遑也孝文纂承洪緒早著叡聖之風時以文明攝事優游恭己玄覽獨得著自不言神契所擿固以符於冥化及躬總大政一日萬機十許年間曾不暇給殊塗同歸百慮一致夫生靈所難行人倫之高迹雖尊居黃屋盡蹈之矣若乃欽明稽古協御天人帝王制作朝野軌度斟酌用舍煥乎其有文章海內黔黎



咸受耳目之賜加以雄才大略愛奇好士視下如傷役  
已利物亦無得而稱之其經緯天地豈虛諡也

三終

北史卷四

魏本紀第四



皇明朝列大夫國子監祭酒臣方從哲

承德郎右春坊右中允管國子監司業事黃汝良等奉

勅重校刊

世宗宣武皇帝諱恪孝文皇帝第二子也母曰高夫人

初夢爲日所逐避於牀下日化爲龍繞已數匝寤而驚

悸遂有娠太和七年閏四月生帝於平城宮二十一年

正月景申立爲皇太子二十三年四月景午孝文帝崩

丁巳太子卽皇帝位諒闇委政宰輔五月高麗國遣使

朝貢六月乙卯分遣侍臣巡行州郡問人疾苦考察守



令黜陟幽明褒禮名賢戊辰追尊皇妣曰文昭皇后秋八月戊申遵遺詔孝文皇帝三夫人已下悉免歸家癸丑增宮臣位一級冬十月癸未鄧至國王象舒彭來朝景戌謁長陵丁酉享太廟十一月幽州人王惠定聚眾反自稱明法皇帝刺史李肅捕斬之是歲州鎮十八水饑分遣使者開倉振恤

景明元年春正月辛丑朔日有蝕之壬寅謁長陵乙巳大赦改元丁未齊豫州刺史裴叔業以壽春內屬二月戊戌復以彭城王勰爲司徒齊將胡松李居士軍屯宛陳伯之水軍逼壽春夏四月景申司徒彭城王勰車騎

將軍王肅大破之己亥皇弟朮薨五月甲寅北鎮饑遣兼侍中楊播巡撫鎮恤六月景子以司徒彭城王勰爲大司馬秋七月己亥朔日有蝕之齊將陳伯之寇淮南八月乙酉彭城王勰破伯之于肥口九月齊州人柳世明聚眾反冬十月丁卯朔謁長陵庚寅齊克二州討世明平之丁亥改授彭城王勰司徒錄尚書事十一月丁巳陽平王頤薨是歲州鎮十七大饑分遣使者開倉振恤高麗吐谷渾等國並遣使朝貢

二年春正月景申朔謁長陵庚戌帝始親政遵遺詔聽



司徒彭城王勰以老歸第進太尉咸陽王禧位太保以  
司空北海王詳為大將軍錄尚書事丁巳引見羣臣于  
太極前殿告以覽政之意壬戌以太保咸陽王禧領太  
尉以大將軍廣陵王羽為司空分遣大使黜陟幽明二  
月庚午進宿衛之官位一級甲戌大赦三月乙未朔詔  
以比年連有軍旅正調之外皆蠲罷壬戌青齊徐兗四  
州大饑人死者萬餘口是月齊雍州刺史蕭衍奉其南  
康王寶融為主東赴建鄴夏五月壬子廣陵王羽薨壬  
戌太保咸陽王禧謀反賜死六月丁亥考諸州刺史加  
以黜陟秋七月癸巳朔日有蝕之乙巳蠕々犯塞辛酉

大赦九月丁酉發畿內夫五萬五千人築京師三百二  
十坊四旬罷己亥立皇后于氏乙卯免壽春營戶並隸  
揚州冬十一月景申以驃騎大將軍穆亮為司空丁酉  
以大將軍北海王詳為太傅領司徒壬寅改築圓丘于  
伊水之陽乙卯仍有事焉十二月齊直後張齊殺其主  
蕭寶卷以降蕭衍是歲高麗吐谷渾等國並遣使朝貢  
三年春二月戊寅以旱故詔州郡掩骸骨三月齊建安  
王寶夤來奔夏四月詔撫軍將軍李崇討魯陽反蠻齊  
主蕭寶融遜位于梁閏四月丁巳司空穆亮薨秋七月  
丁巳朔日有蝕之八月丁卯以前太傅平陽公元丕為



三老九月丁巳行幸鄴丁卯詔使者弔比干墓戊寅閱  
武于鄴南冬十月庚子帝躬御弧矢射遠及一里五十  
步羣臣勒銘于射所甲辰車駕還宮十二月壬寅以太  
極前殿初成饗羣臣賜布帛有差是歲河州大饑死者  
二千餘口西域二十七國並遣使朝貢

四年春正月乙亥親畊籍田三月己巳皇后先蠶于北  
郊四月癸未朔以蕭寶夤為東揚州刺史封丹楊郡公  
齊王庚寅南天竺國獻辟支佛牙戊戌為旱故命鞠寃  
獄己亥減膳徹懸辛丑澍雨大洽五月甲戌行梁州事  
楊椿大破反氐六月壬午朔封皇弟悅為汝南王秋七

以彭城王勰為太師八月勿吉國貢楛矢冬十一月己  
未封武興國世子楊紹先為武興王

正始元年春正月景寅大赦改元夏五月丁未朔太傅  
北海王詳以罪廢為庶人六月以旱故徹樂減膳癸巳  
詔有司修案舊典祇行六事甲午帝以旱故親薦享於  
太廟戊戌詔立周日旦夷齊廟於首陽山庚子以旱故公  
卿以下引咎責躬又錄京師見囚殊死以下皆減一等  
鞭杖之坐悉原之秋七月景子假鎮南將軍李崇大破  
諸蠻八月景子假鎮南將軍元英破梁將馬仙琕於義  
陽詔洛陽令有大事聽面敷奏乙酉元英攻拔義陽辛



卯英又大破梁軍仍清三關丁酉封英爲中山王九月  
詔諸州蠲停徭役不得橫有徵發蠕蠕犯塞詔左僕射  
源懷討之冬十月乙未詔斷羣臣白衣募吏十一月戊  
午詔有司依漢魏舊章營繕國學十二月景子以苑牧  
公田分賜代遷戶己卯詔羣臣議定律令閏月癸卯朔  
行梁州事夏侯道遷據漢中來降乙丑以高陽王雍爲  
司空是歲高麗遣使來朝貢

二年春正月景子封宕昌世子梁彌博爲宕昌王二月  
梁州氐蜀反絕漢中運路州刺史邢巒頻大破之夏四  
月己未城陽王鸞薨乙丑詔曰中正所銓但爲門第吏

部彝倫仍不才舉八坐可審議往代擢賢之體必令才  
學並申資望兼致邢巒遣統軍王足西伐頻破梁諸軍  
遂入劔閣秋七月戊子王足擊破梁軍因逼涪城八月  
壬寅詔中山王英南討襄沔冬十一月戊辰朔武興王  
楊紹先叔父集起謀反詔光祿大夫楊椿討之王足圍  
涪城益州諸郡戎降者十二三送編籍者五萬餘戶旣  
而足引軍退是歲鄧至國遣使朝貢

三年春正月丁卯朔皇子昌生大赦壬申梁秦二州刺  
史邢巒連破氐賊剋武興秦州人王智等聚衆自號王  
公尋推秦州主簿呂苟兒爲主年號建明己卯楊集起



兄弟相率降二月景辰詔求讜言戊午詔右衛將軍元  
麗等討呂苟兒三月己巳以戎旅興詔停諸作己卯樂  
良王長命坐殺人賜死庚寅平南將軍曲江縣公陳伯  
之自梁城南奔夏四月丁未詔罷鹽池禁五月景寅詔  
以時澤未降春稼已旱或有孤老餓疾無人贍救因以  
致死暴露溝塹者令洛陽部尉依法棺埋秋七月庚辰  
元麗大破秦賊降呂苟兒及其王公三十餘人秦涇二  
州平戊子中山王英大破梁徐州刺史王伯敖於陰陵  
己丑詔發定冀瀛相并肆六州卒十萬以濟南軍八月  
壬寅安東將軍邢巒破梁將桓和於孤山諸將所在剋

壬寅安東將軍邢巒破梁將桓和于孤山諸將所在剋  
捷兗州平壬戌曲赦涇秦岐涼河五州九月癸酉邢巒  
大破梁軍于淮南遂 詔 遣 使 朝 貢  
王愉清河王懌廣平王懷汝南王悅講孝經于式乾殿  
是歲高麗蠕々國並遣使朝貢

四年夏四月戊戌鍾離大水中山王英敗績而還六月  
己丑朔詔有司準前式置國子立太學樹小學于四門  
秋八月己亥中山王英齊王蕭寶夤坐鍾離敗除名辛  
丑敦煌人饑詔開倉振恤九月己未詔以徙正宮極庸  
績未酬以司空高陽王雍為太尉尚書令廣陽王嘉為



司空百官悉進位一級庚申夏州長史曹明謀反伏誅  
甲子開斜谷舊道景戌司州人饑詔開倉振恤閏月甲  
戌禁大司馬門不得車馬出入冬十月丁卯皇后于氏  
崩自碣石至于劔閣東西七千里置二十二郡尉是歲  
西域東夷四十餘國並遣使朝貢

永平元年春三月戊子皇子昌薨景午以去年早儉遣  
使者所在振恤夏五月辛卯帝以旱故減膳徹懸六月  
壬申詔依洛陽舊圖脩聽訟觀秋七月甲午立夫人高  
氏為皇后八月壬子朔日有蝕之癸亥冀州刺史京兆  
王愉據州反丁卯大赦改元九月景戌復前中山王英

本封戊戌殺太師彭城王勰癸卯假鎮北將軍李平尅  
信都冀州平冬十月豫州彭城人白早生殺刺史司馬  
悅據城南叛十二月己未尚書邢巒尅懸瓠斬早生禽  
梁將齊苟兒等是歲北狄東夷西域十八國並遣使朝  
貢高昌國王麴嘉表求內徙

二年春正月涇州沙門劉慧汪聚眾反詔華州刺史奚  
康生討之夏四月己酉武州鎮饑詔開倉振恤甲子詔  
緣邊州鎮自今一不聽寇盜境外犯者罪同境內五月  
辛丑帝以旱故減膳徹懸禁斷屠殺甲辰幸華林都亭  
錄囚徒死罪以下降一等六月辛亥詔曰江海方同車



書宜一諸州軌轍南北不等今可申教四方遠近無二  
秋八月景午朔日有蝕之戊申以鄧至國世子像覽蹄  
為其國王九月辛巳封故北海王子顥為北海王壬午  
詔定諸門闥名冬十月癸丑以司空廣陽王嘉為司徒  
庚午郢州獻七寶牀詔不納冬十一月甲申詔禁屠殺  
含孕以為永制十二月詔五等諸侯其同姓者出身公  
正六下侯從六上伯從六下子七正上男正七下異族  
出身公從七上侯從七下伯正八上子正伯下男從八  
上清脩出身公從八下侯正九上伯正九下子從九上  
男從九下是歲西域東夷二十四國並遣使朝貢

三年春二月壬子秦州沙門劉光秀謀反州郡捕斬之  
癸亥秦州隴西羗殺鎮將趙雋反州軍討平之三月景  
戌皇子詡生大赦夏四月平陽郡之禽昌襄陵二縣大  
疫自正月至此月死者二千七百三十人五月丁亥冀  
定二州旱儉詔開倉振恤六月壬寅詔重求遺書於天  
下冬十月辛卯中山王英薨景申詔太常立館使京畿  
內外疾病之徒咸令居處嚴敕醫署分師救療考其能  
否而行賞罰又令有司集諸醫工惟簡精要取三十卷  
以班九服十二月辛巳江陽王繼坐事除名甲申詔於  
青州立孝文皇帝廟殿中侍御史王敞謀反伏誅是歲



西域東夷北狄十六國竝遣使朝貢

四年春正月丁巳汾州劉龍駒聚衆反詔諫議大夫薛和討之二月壬午青齊徐兗四州人饑甚遣使振恤三月壬戌司徒廣陽王嘉薨夏四月梁遣其鎮北將軍張稷及馬仙琕寇朐山詔徐州刺史盧昶率衆赴之五月己亥遷代京銅龍置天泉池西景辰詔禁天文學冬十一月朐山城陷盧昶大敗而還十二月壬戌朔日有蝕之是歲西域東夷北狄二十九國竝遣使朝貢

延昌元年春正月乙巳以頻年水旱百姓饑弊分遣使者開倉振恤景辰以尚書令高肇爲司徒清河王懌爲

司空三月甲午州郡十一大水詔開倉振恤以京師穀貴出倉粟八十萬石以振恤貧者己未安樂王詮薨夏四月詔以旱故斷食粟之畜丁卯詔曰遷京嵩縣年將二紀博士端然虛祿靖言念之有兼愧慨可嚴敕有司國子學孟冬使成太學四門明年暮春令就戊辰以旱故詔尚書與羣司鞠理獄訟辛未詔饑人就穀六鎮丁丑帝以旱故減膳徹懸癸未詔曰肆州地震陷裂死傷甚多亡者不可復追生病宜加療救可遣太醫折傷醫并給所須藥就療乙酉大赦改元詔立理訴殿申訟車以盡冤窮之理五月景午詔天下有粟之家供年之外



悉貸饑人自二月不雨至於五月未晦日有蝕之六月壬申澍雨大洽戊寅通河南牝馬之禁庚辰詔出太倉粟五十萬石以振京師及州郡饑人冬十月乙亥立皇子詡爲皇太子十一月景申詔以東宮建賜天下爲父後者爵一級孝子順孫廉夫節婦旌表門閭量給粟帛十二月己巳詔守宰爲御史彈赦免者及考在中第皆代之是歲西域東夷十國竝遣使朝貢

二年春正月戊戌帝御申訟車親理寃訟二月景辰朔振恤京師貧人甲戌以六鎮大饑開倉拯贍己卯進太尉高陽王雍位太保閏月辛丑以苑牧地賜代遷人無

田者是春人饑死者數萬口夏四月庚子以絹十五萬疋振河南郡人五月甲寅朔日有蝕之是月壽春大水遣平東將軍奚康生等步騎數千赴之六月乙酉青州人饑詔使者開倉振恤甲午曲赦揚州辛亥帝御申訟車親理寃訟是夏十三郡大水秋八月辛卯詔以水旱饑儉百姓多陷罪辜降死以下刑九月景辰以貴族豪門崇習奢侈詔尚書嚴立限級節其流宥冬十月詔以恒肆地震人多死傷重丐一年租賦十二月景戌丐洛陽河陰二縣租賦乙巳詔以恒肆地震人多離災其有課丁沒盡老幼單立家無受復者各賜廩粟以接來稔



是歲東夷西域十餘國竝遣使朝貢

三年春二月乙未詔曰肆州秀容郡敷城縣鴈門郡原平縣竝自去年四月以來山鳴地震于今不已告譴彰咎朕甚懼焉可恤瘼寬刑以荅災譴夏四月青州人饑辛巳開倉振恤乙巳上御申訟車親理寃訟秋八月甲申帝臨朝堂考百司而加黜陟冬十一月辛亥詔司徒高肇爲大將軍平蜀大都督步騎十五萬西伐益州丁巳幽州沙門劉僧紹聚衆反自號淨居國明法王州郡捕斬之十二月庚寅詔立明堂是歲東夷西域八國竝遣使朝貢

四年春正月甲寅帝不豫丁巳崩于式乾殿時年三十三二月甲戌朔上尊諡曰宣武皇帝廟號世宗甲午葬景陵帝幼有大度喜怒不形於色雅性儉素初孝文欲觀諸子志尚大陳寶物任其所取京兆王愉等皆競取珍玩帝唯取骨如意而已孝文大奇之及庶人恂失德孝文謂彭城王勰曰吾固疑此兒有非常志相今果然矣乃見立爲儲貳雅愛經史尤長釋氏之義每至講論連夜忘疲善風儀美容貌臨朝深嘿端嚴若神有人君之量矣

肅宗孝明皇帝諱詡宣武皇帝之第二子也母曰胡充



華永平三年三月景戌生於宣光殿之東北有光照於  
庭中延昌元年十月乙亥立爲皇太子四年正月丁巳  
宣武帝崩是夜太子卽皇帝位戊午大赦己未徵下西  
討東防諸軍庚申詔太保高陽王雍入居西栢堂決庶  
政以任城王澄爲尚書令百官總已以聽二王二月庚  
辰尊皇后高氏爲皇太后辛巳司徒高肇至京師以罪  
賜死癸未進太保高陽王雍位太傅領太尉以司空清  
河王懌爲司徒以驃騎大將軍廣平王懷爲司空乙亥  
尊胡充華爲皇太妃三月甲辰朔皇太后出俗爲尼徒  
御金墉城景辰詔進宮臣位一級乙丑進文武羣官位

一級夏六月沙門法慶聚衆反於冀州殺阜城令自稱  
大乘秋八月乙亥領軍于忠矯詔殺左僕射郭祚尚書  
裴植免大傅高陽王雍官以王還第景子尊皇太妃爲  
皇太后戊子帝朝太后於宣光殿大赦己丑進司徒清  
河王懌爲太傅領太尉以司空廣平王懷爲太保領司  
徒任城王澄爲司空庚寅以車騎大將軍于忠爲尚書  
令特進崔光爲車騎大將軍竝儀同三司壬辰復江陽  
王繼本國復濟南王彧先封爲臨淮王羣臣奏請皇太  
后臨朝稱制九月乙巳皇太后親覽萬機甲寅征西大  
將軍元遙破斬法慶傳首京師安定王燮薨冬十二月



辛丑以高陽王雍爲太師己酉鎮南將軍崔亮破梁將  
趙祖悅軍遂圍硤石丁卯帝皇太后謁景陵是歲東夷  
西域北狄十八國竝遣使朝貢

熙平元年春正月戊辰朔大赦改元荆沔都督元志大  
破梁軍以吏部尚書李平爲行臺節度討硤石諸軍二  
月乙巳鎮東將軍蕭寶夤大破梁將於淮北癸亥初聽  
秀才對策第中上已上叙之乙丑鎮南崔亮鎮將李平  
等剋硤石斬趙祖悅傳首京師盡俘其衆三月戊辰朔  
日有蝕之夏四月戊戌以瀛州人饑開倉振恤五月丁  
卯朔以災旱命釐察獄訟權停作役庚午詔放華林野

獸於山澤秋七月庚午重申殺牛禁八月景午詔古帝  
諸陵四面各五十步勿聽耕稼九月丁丑淮堰破梁緣  
淮城戍村落十餘萬口皆漂入海是歲吐谷渾宕昌鄧  
至高昌陰平等國並遣使朝貢

二年春正月大乘餘賊復相聚攻瀛州刺史宇文福討平  
之甲戌大赦庚寅詔遣大使巡行四方問疾苦恤孤寡黜  
陟幽明二月丁未封御史中尉元匡爲東平王三月丁亥  
太保領司徒廣平王懷薨夏四月丁酉詔京尹所統年高  
者板賜郡各有差戊申以開府儀同三司胡國珍爲司徒  
乙卯皇太后幸伊闕石窟寺卽日還宮改封安定王超爲



北平王五月庚辰重申天文禁犯者以大辟論秋七月乙亥儀同三司汝南王悅坐殺人免官以王還第己巳享太廟八月戊戌宴道武以來宗室年十五以上於顯陽殿申家人禮己亥詔庶族子弟年未十五不聽入任庚子詔咸陽京兆二王子女還附屬籍丁未詔太師高陽王雍入居門下參決尚書奏事冬十月以幽冀滄瀛光五州饑遣使巡撫開倉振恤是歲東夷西域氏羌等十一國並遣使朝貢

神龜元年春正月甲子詔以氏酋楊定爲陰平王壬申詔給京畿及諸州老人板郡縣各有差及賜鰥寡孤獨粟帛庚辰詔以雜役戶或冒入清流所在職人皆令五

人相保無人任保者奪官還役乙酉秦州羌及幽州大飢死者三千七百九十人詔刺史開倉振恤二月己酉詔以神龜表瑞大赦改元東益州氏反三月南秦州氏反夏四月丁酉司徒胡國珍薨甲辰改封江陽王繼爲京兆王六月自正月不雨是月辛卯澍雨乃降秋七月河州人却鐵忽聚衆反自稱水池王閏月甲辰開恒州銀山禁八月癸丑朔詔京師見囚殊死以下悉減一等甲子却鐵忽詣行臺源子恭降九月戊申皇太后高氏崩于瑤光寺冬十月丁卯以尼禮葬高太后於芒山十一月辛未詔曰人生有終下歸兆域京邑隱振口盈億



萬貴賤攸憑未有定所今制乾脯山以西擬爲九原是  
歲東夷西域北狄十一國並遣使朝貢

二年春正月辛巳朔日有蝕之丁亥詔曰皇太后撫挹  
自居稱號弗備宜遵舊典稱詔宇內以副黎蒸元元之  
望是月改葬文昭皇太后高氏二月乙丑齊郡王祐薨  
庚午羽林千餘人焚征西將軍張彝第毆傷彝燒殺其  
子均乙亥大赦丁丑詔求直言壬寅詔以旱故命依舊  
雩祈察理寃獄掩骼埋骼振窮恤寡三月甲辰澍雨太  
洽夏五月戊戌以司空任城王澄爲司徒京兆王繼爲  
司空秋八月乙未御史中尉東平王匡坐事削除官爵

九月庚寅皇太后幸嵩高山癸巳還宮冬十一月癸丑  
司徒任城王澄薨庚申大赦詔除淫祀焚諸雜神是歲  
吐谷渾宕昌嚙噠等國並遣使朝貢

正光元年春正月乙亥朔日有蝕之夏四月景辰詔尚  
書長孫承業巡撫北蕃觀察風俗五月辛巳以炎旱故  
詔八座鞠見囚申枉濫秋七月景子侍中元乂中常侍  
劉騰奉帝幸前殿矯皇太后詔歸政遜位乃幽皇太后  
北宮殺太傅清河王懌總勒禁旅決事殿中辛卯帝加  
元服大赦改元內外百官進位一等八月甲寅相州刺  
史中山王熙舉兵欲誅騰不果見殺九月壬辰蠕蠕主



阿那瓌來奔戊戌以太師高陽王雍爲丞相冬十月乙卯以儀同三司汝南王悅爲太尉十一月己亥封阿那瓌爲朔方郡公蠕蠕王十二月壬子詔送蠕蠕王阿那瓌歸北辛酉以司空京兆王繼爲司徒

二年春正月南秦州氐反二月車駕幸國子學講孝經三月庚午幸國子學祠孔子以顏回配甲午右衛將軍奚康生於禁中將殺元又不果爲又所害以儀同三司劉騰爲司空夏四月庚子進司徒京兆王繼位太保壬寅以儀同三司崔光爲司徒五月丁酉朔日有蝕之秋七月己丑以旱故詔有司修案舊典祇行六事八月己

巳蠕蠕後主郁久閭侯匿伐來奔懷朔鎮十二月甲戌詔司徒崔光安豐王延明等議定服章庚辰以東益南秦州氐反詔河間王琛討之失利是歲焉耆居密波斯高昌勿吉伏羅高車等國並遣使朝貢

三年春正月辛亥耕籍田夏四月庚辰以高車國王羅伊訶爲鎮西將軍西海郡公高車國王五月壬辰朔日有蝕之六月己巳以旱故詔分遣有司馳祈岳瀆及諸山川百神能興雲雨者命理寃獄止土功減膳徹懸禁止屠殺冬十一月己丑朔日有蝕之乙巳祀丘圓景午詔班曆大赦十二月癸酉以太保京兆王繼爲太傅



司徒崔光爲太保是歲波斯不溪龜茲吐谷渾並遣使朝貢

四年春二月壬申追封故咸陽王禧爲敷城王京兆王愉爲臨洮王清河王懌爲范陽王以禮加葬丁丑河間王琛章武王融並以貪污削爵除名己卯蠕蠕主阿那瓌率衆犯塞遣尚書左丞元孚爲北道行臺持節喻之蠕蠕後主郁久閭侯匿伐來朝司空劉騰薨夏四月阿那瓌執元孚北遁秋八月癸未追復故范陽王懌爲河間王九月丁酉詔太尉汝南王悅入居門下與丞相高陽王雍參決尚書奏事冬十一月癸未朔日有蝕之景

申趙郡王謚薨丁酉太保崔光薨十二月以太尉汝南王悅爲太保徐州刺史北海王顥坐貪汙削爵除官是歲宕昌庫莫奚國並遣使朝貢

五年春正月辛丑祀南郊三月沃野鎮人破六韓拔陵反聚衆殺鎮將號真王元年夏四月高平酋長胡琛反自稱高平王攻鎮以應拔陵別將盧祖遷擊破之五月都督北征諸軍事臨淮王彧攻討敗於五原削除官爵壬申詔尚書令季崇爲大都督率廣陽王深等北討六月秦州城人莫折大提據城反自稱秦王殺刺史李彥大提尋死子念生代立僭稱天子年號天建置立百官



丁酉大赦秋七月戊午復河間王琛臨淮王彧本封是  
月涼州幢帥于菩提呼延 執刺史宋穎據州反念生  
遣其兄高陽王天生下隴東寇八月甲午雍州刺史元  
志西討大敗於隴東退守岐州景申詔諸州鎮軍元非  
犯配者悉免爲編戶改鎮爲州依舊立稱九月壬申詔  
尚書左僕射齊王蕭寶夤爲西道行臺大都督復撫軍  
北海王顥官爵爲都督並率諸將西討乙亥帝幸明堂  
餞寶夤等吐谷渾主伏連籌遣兵討涼州于菩提走追  
斬之城人趙天安復推宋穎爲刺史冬十月營州城人  
劉安定就德興據城反執刺史李仲遵城人王惡兒斬

安定以降德興東走自號燕王十二月詔太傅京兆王  
繼爲太師大將軍率諸將西討汾州正平平陽胡叛逾  
詔復征東將軍章武王融封爵爲大都督率衆討之莫  
折念生遣兵攻涼州城人趙天安復執刺史以應之是  
歲厭噠契丹地豆于庫莫奚等國並遣使朝貢

孝昌元年春正月庚申徐州刺史元法僧據城反自稱  
宋王年號天啓遣其子景仲歸梁梁遣其將豫章王綜  
入守彭城法僧擁其僚屬南入詔臨淮王彧尚書李憲  
爲都督安豐王延明爲東道行臺俱討徐州癸亥蕭寶  
夤及征西將軍崔延伯大破賊於黑水天生退走入隴



涇歧及隴悉平以太師大將軍京兆王繼爲太尉二月  
詔追復故樂良王長命爵以其子忠紹之戊戌太赦三  
月甲戌詔五品以上各薦所知夏四月辛卯皇太后復  
臨朝攝政引羣臣面陳得失壬辰征西將軍都督崔延  
伯大敗於涇川戰歿六月癸未大赦改元蠕蠕主阿那  
瓌大破拔陵是月諸將逼彭城蕭綜夜潛出降梁諸將  
奔退衆軍追躡免者十一二秋八月癸酉詔斷遠近貢  
獻珍麗違者免官柔玄鎮人杜洛周反於上谷年號真  
王九月乙卯詔減天下諸調之半壬戌詔五品以上各  
舉所知辛未曲政南北秦州冬十月蠕蠕遣使朝貢十

一月辛亥詔父母年八十以上者皆聽居官時四方多  
事諸蠻復反十二月山胡劉蠡升反自稱天子

二年春正月庚戌封廣平王懷長子誨爲范陽王壬子  
以太保汝南王悅領太尉是月五原鮮于修禮反於定  
州年號魯興二月庚申帝及皇太后臨大夏門親覽寬  
訟三月庚子追復中山王熙本爵以其子叔仁紹之夏  
四月大赦戊申北討都督河間王琛長孫承業失利奔  
還詔並免官爵五月丁未車駕將北討內外戒嚴前給  
事黃門侍郎元略自梁還朝封義陽王以丞相高陽王  
雍爲大司馬六月己巳曲赦齊州絳蜀陳雙熾聚衆反



自號始建王曲赦平陽建興正平三郡詔假鎮西將軍  
都督長孫承業討雙熾平之景子改封義陽王略爲東  
平王戊寅詔復京兆王維本封江陽王戊子詔曰自運  
屬艱棘歷載於茲朕威德不能遐被經略無以及遠何  
以苟安黃屋無愧黔黎今便避居正殿蔬飧素服當親  
自招募收集忠勇其有直言正諫之士敢決徇義之夫  
二十五日悉集華林東門人別引見共論得失秋八月  
景子進封廣川縣公元邵爲常山王戊子進武城縣公  
子攸爲長樂王癸巳賊帥元洪業斬鮮于修禮請降爲  
賊黨葛榮所殺九月辛亥葛榮敗都督廣陽王深章武

王融於博野白牛邏融歿於陣榮自稱天子國號齊年  
稱廣安冬十一月戊戌杜洛周攻陷幽州執刺史王延  
年及行臺常景景午稅京師田租畝五升借賃公田者  
畝一斗閏月稅市人出入者各一錢店舍爲五等梁將  
元樹逼壽春楊州刺史李憲力屈而降初留州縣及長  
史司馬戊戌主副質子於京師詔項舊京淪覆中原喪亂  
宗室子女屬籍在七廟內爲雜戶濫門拘辱者悉聽離  
絕是歲疊伏羅庫國並遣使朝貢

三年春正月甲戌以司空皇甫度爲司徒儀同三司蕭  
寶寅爲司空辛巳葛榮陷殷州刺史崔楷固節死之甲



申詔峻鑄錢之制蕭寶夤大敗于涇州北海王顥尋亦  
敗走曲赦關西及正平平陽建興戊子以司徒皇甫度  
爲太尉己丑以四方未平詔內外戒嚴將親征二月丁  
酉詔開輸賞格輸粟入瀛定岐雍四州者官斗二百斛  
賞一階入二華州者五百石賞一階不限多少粟畢授  
官虜賊據潼關三月甲子詔將西討中外戒嚴虜賊走  
復潼關秋七月相州刺史安樂王鑒據州反己丑大赦  
八月都督源子邕李神軌裴衍攻鄴丁未斬鑒相州平  
九月己未東豫州刺史元慶和以城南叛秦州城人杜  
粲殺莫折念生自行州事冬十月戊申曲赦恒農巴西

河北正平平陽邵郡及關西諸州軍甲寅雍州刺史蕭  
寶夤據州反自號齊年稱隆緒十一月己丑葛榮攻陷  
冀州執刺史元浮逐出居人凍死者十六七十二月戊  
申都督源于邕裴衍與榮戰敗於陽平東北並歿是月  
杜粲爲駱超所殺超遣使歸罪是歲蠕蠕遣使朝貢  
武泰元年春正月乙丑生皇女祕言皇子景寅大赦改  
元丁丑雍州人侯終德相率攻蕭寶夤寶夤度渭走雍  
州平二月癸丑帝崩於顯陽殿時年十九甲寅皇子卽  
位大赦皇太后詔曰皇家握曆受圖年將二百祖宗累  
聖社稷載安高祖以文思先天世宗以下武繼世大行



在御重以寬仁奉養幸由溫明恭順實望穹靈降祐麟  
趾衆繁自潘充華有孕椒宮冀誕儲兩而熊羆無兆唯  
虺遂彰于時直以國步未康假稱統胤欲以底定物情  
係仰宸極何圖一旦弓劔莫追皇曾孫故臨洮王寶暉  
世子釗體自高祖天表卓異大行平日養愛特深義齊  
若子事符當璧允膺大寶卽日踐祚可班宣遠邇咸使  
知之乙卯幼主卽位儀同三司大都督尔朱榮抗表請  
入奔赴勒兵而南是月杜洛周爲葛榮所并三月甲申  
上尊諡曰孝明皇帝乙酉葬於定陵廟號肅宗四月戊  
戌爾朱榮濟河庚子皇太后幼主崩

論曰宣武承聖考德業天下想望風化垂拱無爲邊徼  
稽服而寬以攝下從容不斷太和之風替矣比之漢世  
安順宣武之後繼以元成孝明沖齡統業靈后婦人專  
制任用非人賞罰乖舛於是豐起宇內禍延邦畿卒於  
享國不長抑亦淪胥之始也



北史卷五

魏本紀第五

皇明朝列大夫國子監祭酒臣方從哲

憲郎右春坊右中允管國子監司業事臣黃汝良等奉

勅重校刊

敬宗孝莊皇帝諱子攸彭城王勰之第三子也母曰李妃明帝初以勰有魯陽翼衛之勲封帝武城縣公幼侍明帝書於禁中及長風神秀慧姿貌甚美雅為明帝親待孝昌二年八月進封長樂王歷位侍中中軍將軍以兄彭城王劭事轉為衛將軍左光祿大夫中書監實見出也武泰元年二月明帝崩大都督尔朱榮謀廢立以



帝家有忠勲且兼人望陰與帝通率眾來赴帝與兄弟  
夜北度河會榮於河陽

永安元年夏四月戊戌帝南濟河卽皇帝位以皇兄彭  
城王劭爲無上王皇帝霸城公子正爲始平王以尔朱  
榮爲使持節侍中都督中外諸軍事大將軍尚書令領  
軍將軍領左右封太原王己亥百僚相率有司奉璽綬  
備法駕奉迎于河梁西至陶渚榮以兵權在己遂有異  
志乃害靈太后及幼主次害無上王劭始平王子正又  
害丞相高陽王雍己下王公卿士二千八列騎衛帝遷  
于便幕榮尋悔稽顙謝罪辛丑車駕入宮御太極殿大

赦改武泰爲建義元年壬寅榮表請追諡無上王爲皇  
帝餘死河陰者諸王刺史贈三司三品者令僕五品者  
刺史七品以下及庶人郡鎮諸死者子孫聽立後授封  
爵詔從之癸卯以前太尉江陽王繼爲太師以司州牧  
相州刺史北海王顥爲太傅開府仍刺史封光祿大夫  
清泉縣侯李延實爲陽平王位太保遷太傅以并州刺  
史元大穆爲太尉封上黨王以儀同三司楊椿爲司徒  
以儀同三司頓丘郡公穆紹爲司空領尚書令進爵爲  
王以雍州刺史長孫承業爲開府儀同三司進封馮翊  
王以殿中尚書元諶爲尚書右僕射封魏郡王以給事



黃門侍郎元瑱爲東海王甲辰以敷城王坦爲咸陽王  
以諫議大夫元貴平爲東萊王以直閣將軍元肅爲魯  
郡王以祕書郎中元曄爲長廣王以馮翊郡公源紹景  
復先爵隴西王扶風郡公馮冏東郡公陸子彰北平公  
長孫悅並復先王爵以北平王超還復爲安定王丁未  
詔中外解嚴庚戌封太將軍尔朱榮次子义羅爲梁郡  
王詔蠕蠕王阿那瓌讚拜不名上書不稱臣是月汝南  
王悅北海王顥臨淮王彧前後奔梁五月丁巳朔以右  
僕射元羅爲東道大使光祿勳元欣副之循方黜陟先  
行後聞辛酉大將軍尔朱榮還晉陽帝餞於邕陰六月

癸卯以高昌王世子光爲平西將軍瓜州刺史襲爵秦  
臨縣伯高昌王帝以寇難未夷避正殿責躬撤膳又班  
募格收集忠勇有直言正諫之士者集華林園面論時  
事幽州平北府主薄河間邢杲率河北流移人萬餘戶  
反於北海自署漢王年號天統秋七月乙丑加大將軍  
尔朱榮柱國大將軍錄尚書事壬子光州人劉舉聚衆  
反於濮陽自稱皇武大將是月高平鎮人萬俟醜奴僭  
稱大位臨淮王彧自江南還朝八月太山太守羊侃據  
郡反甲辰詔大都督宗正珍孫討劉舉平之九月己巳  
以齊州刺史元欣爲沛郡王壬申柱國大將軍尔朱榮



率騎七千討葛榮於滏口破禽之冀定滄瀛殷五州平  
乙亥以葛榮平大赦改元爲永安辛巳以尔朱榮爲大  
丞相進榮子平昌郡公文殊昌樂郡公文暢爵並爲王  
以司徒楊椿爲太保城陽王徽爲司徒冬十月丁亥尔  
朱榮檻送葛榮於京師帝臨閭闔門榮稽顙謝罪斬於  
都市戊戌江陽王繼薨癸丑復膠東縣侯李侃希祖爵  
南郡王是月大都督費穆大破梁軍禽其將曹義宗檻  
送京師梁以北海王顥爲魏主年號孝基入據南兗之  
鉅城十一月戊午以無上王世子韶爲彭城王陳留王  
子寬爲陳留王寬弟剛爲浮陽王剛弟質爲林慮王癸

亥行臺于暉等大破羊侃於瑕丘侃奔梁戊寅封前軍  
元凝爲東安王是歲葛榮遣黨韓樓復據幽州反  
二年春二月甲午追尊皇考爲文穆皇帝廟號肅祖皇  
妣爲文穆皇后夏四月癸未遷文穆皇帝及文穆皇后  
神主于太廟降畿內死罪已下刑辛丑上黨王天穆大  
破邢杲於濟南杲降送赴京師斬于都市五月壬子朔  
元顥尅梁國乙丑內外戒嚴癸酉元顥陷滎陽甲戌夜  
車駕北巡乙亥幸河内景子元顥入洛丁丑進封城陽  
縣公元祉爲平原王安昌縣公元鷲爲華山王戊寅太  
原王尔朱榮會車駕於長子即日反旆上黨王天穆北



度會車駕于河內秋七月戊辰都督尔朱兆賀拔勝從  
碓石夜濟破顥子冠受及安豐王廷明軍元顥敗走庚  
午車駕入居華林園升大夏門大赦壬申以柱國大將  
軍太原王尔朱榮為天柱大將軍癸酉臨潁縣卒江豐  
斬元顥傳首京師甲戌以大將軍上黨王天穆為太宰  
以司徒城陽王徽為大司馬太尉己卯以南青州刺史  
元旭為襄城王南兗州刺史元暹為汝陽王閏月辛巳  
帝始居宮內辛卯兼吏部尚書楊津為司空八月己  
未以太傅李延寧兼司徒丁卯封瓜州刺史元太宗為  
東陽王九月大都督侯深破韓樓于薊斬之幽州平冬

十月乙酉朔日有蝕之丁丑以前司空丹楊王蕭贊為  
司徒十一月己卯就德興自榮州遣使請降景午以大  
司馬太尉城陽王徽為太保以司徒丹楊王蕭贊為太  
尉以雍州刺史長孫承業為司徒

三年夏四月丁卯雍州刺史尔朱天光討萬俟醜奴蕭  
寶夤於安定破囚之禽送京師甲戌以閔中平大赦斬  
醜奴于都市賜寶夤死六月戊午嚙噠國獻師子一是  
月白馬龍涸胡王慶雲僭號於永洛城秋七月景  
子尔朱天光平永洛城禽慶雲九月辛卯天柱大將軍  
尔朱榮上黨王天穆自晉陽來朝戊戌帝殺榮天穆於



明光殿及榮子菩提乃升閭闔門大赦遣武衛將軍奚  
毅前燕州刺史侯深率衆鎮北中是夜左僕射尒朱世  
隆榮妻鄉郡長公率主榮部曲自西陽門出屯河陰巳  
亥攻河橋禽毅等屠害之據北中城南逼京師冬十月  
癸卯朔封大鴻臚卿寶炬為南陽王汝陽縣公修為平  
陽王新陽伯誕為昌樂王琅耶公昶為太原王甲辰徙  
封魏郡王諶為趙郡王諶弟子趙郡王宣為平昌王戊  
申皇子生大赦乙卯通直散騎常侍李苗以火船焚河  
橋尒朱世隆退走壬申世隆停建興之高都尒朱兆自  
晉賜來會之共推長廣王曄為主大赦所部年號建明

徒長孫承業為太尉以臨淮王彧為司徒景子進雍州  
刺史廣宗郡公尒朱天光爵為王十二月甲辰尒朱兆  
尒朱度律自富平津上率騎涉度以襲京城事出倉卒  
禁衛不守帝步出雲龍門兆逼帝幸永寧寺殺皇子亂  
兵煞司徒臨淮王彧左僕射范陽王誨戊申尒朱度律  
自鎮京師甲寅尒朱兆遷帝於晉陽甲子帝遇弒於城  
內三級佛寺時年二十四并害陳留王寬中興二年廢  
帝奉諡為武懷皇帝及孝武立又以廟諱故改諡孝莊  
皇帝廟號敬宗葬靜陵

節閔皇帝諱恭字修業廣陵惠王羽之子也母曰王氏



帝少有志度守祖母嫡母以孝聞正始中襲爵位給事黃門侍郎帝以元義擅權託稱瘖病絕言垂一紀居於龍花佛寺無所交通永安末有白莊帝言帝不語將有異圖人間遊聲又云常有天子氣帝懼禍遂逃匿上洛尋見追躡送京師拘禁多日以無狀獲免及莊帝崩介朱世隆等以元曄踈遠又非人望所推以帝有過人之量將謀廢立恐實不語乃令帝所親申意兼迫脅帝曰天何言哉世隆等大悅及元曄至邛南世隆等奉帝東郭外行禪讓禮太尉介朱度律奉路車進璽紱服袞冕百官侍衛入自建春雲龍門

百官侍衛入自建春雲龍門

普泰元年春二月己巳皇帝卽位於太極前殿羣臣拜賀禮畢遂登闔闔門大赦以魏為大魏改建明二年為普泰元年罷稅市及稅鹽之官庚午詔曰自秦之末競為皇帝忘負乘之深殃垂貪鄙於萬葉予今稱帝已為襲矣可普告令知是月鎮遠將軍清河崔祖螭聚青州七郡之衆圍東陽幽州刺史劉靈助起兵於薊河北大使高乾及其弟昂夜襲冀州執刺史元疑共推前河內太守封隆之行州事三月癸酉封長廣王曄為東海王以青州刺史魯郡王肅為太師沛郡王欣為太傅司州



收改封淮陽王以徐州刺史彭城王尒朱仲遠雍州刺史隴西王尒朱天光並為大將軍以柱國大將軍并州刺史潁川王尒朱兆為天柱大將軍封晉州刺史平陽郡公高歡為勃海王以特進清河王亶為太傅以尚書令樂平王尒朱世隆為太保以趙郡王諶為司空景申定州刺史侯深破劉靈助於安國城斬之傳首京師夏四月壬子享太廟癸酉隴西王尒朱天光破宿勒明達禽送京師斬之景寅以侍中尒朱彥伯為司徒詔有司不得復稱偽梁罷細作之條無禁隣國還往五月景子尒朱仲遠使其都督魏僧勗等討崔袒螭於東陽斬之

誅尒朱氏為名秋七月壬申尒朱世隆等害前太保楊椿前司空楊津景戌司徒尒朱彥伯以旱遜位九月以彭城王尒朱仲遠為太宰庚辰以隴西王尒朱天光為大司馬癸巳追尊皇考為先帝皇妣王氏為先太妃封皇弟末業為高密王皇子于恕為勃海王冬十月壬寅高歡推勃海太守元朗即皇帝位於信都

二年春閏二月高歡敗尒朱天光等於韓陵夏四月辛巳高歡與廢帝至芒山使魏蘭根慰喻洛邑且觀帝之為人蘭根忌帝雅德還致毀謗竟從崔陵議廢帝於崇訓佛寺而立平陽王修是為孝武帝帝既失位乃賦詩



日朱門久可患紫極非倩翫顛覆立可待一年三易換  
時運正如此唯有修真觀五月景申帝遇弑殂於門下  
外省時年三十五孝武帝詔百司赴會葬用王禮加九  
旒鑾輅黃屋左纛班劍百二十人後西魏追謚節閔皇  
帝

廢帝諱朗字仲哲章武王融第三子也母曰程氏帝少  
稱明悟元暉建明二年正月戊子為勃海太守普泰元  
年十月勃海王高歡奉帝以主號令

中興元年冬十月壬寅皇帝即位於信都西大赦改普  
泰元年為中興以勃海王高歡為丞相都督中外諸軍

泰元年為中興以勃海王高歡為丞相都督中外諸軍  
事以河北大使高乾為司空辛亥高歡大破尨朱兆於  
廣阿十一月梁將元樹入據譙城

二年春二月甲子以勃海王高歡為大丞相柱國大將  
軍太師及歡敗尨朱氏於韓陵四月辛巳帝於河陽遜  
位於別邸五月孝武封帝為安定郡王十一月殂於門  
下外省時年二十永熙二年葬於鄴西南野馬崗

孝武皇帝諱修字孝則廣平武穆王懷之第三子也母  
曰李氏帝性沉厚學涉好武事遍體有鱗文年十八封  
汝陽縣公夢人有從諱謂已曰汝當大貴得二十五年



永安三年封平陽王普泰中為侍中尚書左僕射中興  
二年高歡既敗尔朱氏廢帝自以疎遠請遜大位歡乃  
與百寮議以孝文不可無後時召汝南王悅於梁至將  
立之宿昔而止又王皆逃匿帝在田舍先是嵩山道  
士潘彌望見洛陽城西有天子氣候之乃帝也於是造  
第密言之若五旬而高歡使斛斯椿求帝椿從帝所親  
王思政見帝變色曰非賣我耶椿遂以白歡遣四  
百騎奉迎帝入羶帳陳誠泣下霑襟讓以寡德歡再拜  
帝亦拜歡出備服御進湯沐達夜嚴警昧爽文武執鞭  
以朝使斛斯椿奉勸進表椿入帷門聲折延首而不敢  
前帝令思政取表曰視便不得不稱朕矣於是假廢帝  
安定王詔策而禪位焉即位於東郭之外用代都舊制  
以黑羶蒙七人歡居其一帝於羶上西向拜天訖自東  
陽雲龍門入

永熙元年夏四月戊子皇帝御太極前殿羣臣朝賀禮  
畢升闔闔門大赦改中興二年為太昌元年壬辰高歡  
還鄴五月景申節閔帝殂以太傅淮陽王欣為太師改  
封沛郡王以司徒趙郡王諶為太保以司空南陽王寶  
炬為太尉以太保長孫承業為太傅辛丑復前司空高  
乾位己酉以儀同三司清河王亶為司徒乙卯内外解



嚴六月癸亥朔帝於華林園納訟丁卯南陽王寶炬坐  
事降為驃騎大將軍開府以王歸第己卯臨顯陽殿納  
訟景成詔曰間者凶權誕恣法令變常遂立美貊輕賦  
冀收天下之意隨以箕歛之重終納十倍之征掩目捕  
雀何能過此今歲租調且兩收一巧明年復舊秋七月  
庚子以南陽王寶炬為太尉乙卯帝臨顯陽殿親理冤  
獄是月東南道大行臺樊子鵠大破梁軍于譙城禽其  
將元樹八月丁卯封西中郎將元寧為高平王九月癸  
卯進燕郡公賀拔允爵為王癸丑改封沛郡王欣為廣  
陵王節閔子勃海王子恕為沛郡王冬十月辛酉朔日

壬申己酉以汝南王悅為侍中大司馬開府葬太后胡  
氏十二月丁亥殺大司馬汝南王悅大赦改元為永興  
以同明元時年號尋改為永熙是歲蠕蠕嚙噠高麗契  
丹庫莫奚高昌等國並遣使朝貢

二年春正月庚寅朔朝饗羣臣于太極前殿丁酉勃海  
王高歡大敗尔朱氏山東平罷諸行臺丁巳追尊皇考  
為武穆皇帝太妃馮氏為武穆皇后皇妣李氏曰皇太  
妃二月以咸陽王坦為司空三月甲午太師魯郡王肅  
薨丁巳以太保趙郡王諶為太尉以太尉南陽王寶炬  
為尚書令太保開府是月阿至羅十萬戶內附詔復以



勃海王高歡爲大行臺隨機裁處夏四月己未朔日有  
蝕之秋七月壬辰以太師廣陵王欣爲大司馬以太尉  
趙郡王諶爲太師並開府庚戌以前司徒燕郡王賀拔  
允爲太尉冬十月癸未以衛將軍瓜州刺史秦臨縣伯  
高昌王趙子堅爲儀同三司進爵郡公十二月丁巳狩  
於嵩陽士卒寒苦己巳遂幸溫湯丁丑還宮

三年春二月壬戌大赦壬午封左衛將軍元斌之爲潁  
川王夏四月癸丑朔日有蝕之辛未高平王寧坐事降  
爵爲公五月景戌置勳府庶子箱別六百人騎官箱別  
二百人閣內部曲數千人帝內圖高歡乃以斛斯椿爲

領軍使與王思政等統之以爲心膂軍謀朝政咸決於  
椿分置督將及河南關西諸刺史辛卯下詔戒嚴揚聲  
伐梁實謀北討是夏契丹高麗吐谷渾並遣使朝貢秋  
七月己丑帝親總六軍十餘萬次河橋高歡引軍東度  
景午帝率南陽王寶炬清河王亶廣陽王湛斛斯椿以  
五千騎宿於湮西楊王別舍沙門都維那惠臻負壘持  
千牛刀以從有牛百頭盡殺以食軍士衆知帝將出其  
夜亡者過半清河廣陽二王亦逃歸略陽公宇文泰遣  
都督駱超李賢和各領數百騎赴駱超先至甲戌賢和  
會帝於崦中己酉高歡入洛遣婁昭及河南尹元子思



北史卷五  
帝紀  
領左右侍官追帝請迴駕高昂率勁騎及帝於陝西帝  
鞭馬長驚至湖城饑渴甚有王思村人以麥飯壺漿獻  
帝帝甘之復一村十年是歲二月熒惑入南斗衆星北  
流羣鼠浮河向鄴梁武跣而下殿以襪星變及聞帝之  
西慙曰虜亦應天平帝至稠乘潼關大都督毛洪賓迎  
獻食八月宇文泰遣大都督趙貴梁禦甲騎二千來赴  
乃奉迎帝過河謂禦曰此水東流而朕西上若得重謁  
洛陽廟是卿等功也帝及左右皆流涕宇文泰迎帝於  
東陽帝勞之將士皆呼萬歲遂入長安以雍州公廨爲  
宮大赦甲寅高歡推司徒清河王亶爲大司馬承制總

宮大赦甲寅高歡推司徒清河王亶爲大司馬承制總  
萬機居尚書省歡追車駕至潼關九月己酉歡東還洛  
陽帝親督衆攻潼關斬其行臺華長瑜又剋華州其冬  
十月高歡推清河王亶子善見爲主徙都鄴是爲東魏  
魏於此始分爲二帝之在洛也從妹不嫁者三一曰平  
原公主明月南陽王同產也二曰安德公主清河王懌  
女也三曰蒺藜亦封公主帝內宴令諸婦人詠詩或詠  
鮑照樂府曰朱門九重門九閨願逐明月入君懷帝旣  
以明月入閨蒺藜自縊宇文泰使元氏諸王取明月殺  
之帝不悅或時彎弓或時推案君臣由此不安平閨十



二月癸巳潘彌奏言今日當甚有急兵其夜帝在逍遙園宴阿至羅顧侍臣曰此處彷彿華林園使人聊增悽怨命取所乘波斯騮馬使南王陽躍之將攀鞍蹶而死帝惡之日宴還宮至後門馬驚不前鞭打入謂潘彌曰今日幸無他不彌曰過夜半則大吉須臾帝飲酒遇醜而崩時年二十五謚曰孝武殯于草堂佛寺十餘年乃葬雲陵始宣武孝武明間謠曰狐非狐貉非貉焦梨狗子齧斷索識者以為索謂本索髮焦梨狗子指宇文泰俗謂之黑獺也

文皇帝諱寶炬孝文皇帝之孫京兆王愉之子也母曰乃得雪正光中拜直閣將軍時胡太后多嬖寵帝與明帝謀誅之事泄免官武泰中封邵縣侯永安三年進封南陽王孝武卽位拜太尉加侍中永熙二年進位太保開府尚書令三年孝武與高歡構難以帝爲中軍四面大都督及從人關拜太宰錄尚書事孝武崩丞相略陽公宇文泰率羣公卿士奉表勸進三讓乃許焉

大統元年春正月戊申皇帝卽位於城西大赦改元追尊皇考爲文景皇帝皇妣楊氏爲皇后己酉進丞相略陽公宇文泰都督中外諸軍錄尚書事大行臺改封安定郡公以尚書令斛斯椿爲太保廣平王贊爲司徒乙



卯立妃乙氏爲皇后立皇子欽爲皇太子甲子以廣陵  
王欣爲太傅以儀同三司万俟壽樂干爲司空東魏將  
侯景攻陷荊州二月前南青州刺史大野拔斬兗州刺  
史樊子鵠以州降東魏夏五月降罪人加安定公宇文  
泰位柱國秋七月以開府儀同三司念賢爲太尉以司  
空万俟壽樂干爲司徒以開府儀同三司越勒肱爲司  
空梁州刺史元羅以州降梁九月有司詔煎御香澤須  
錢萬貫帝以軍旅在外停之冬十月太師上黨王長孫  
承業薨十二月以太尉念賢爲太傅以河州刺史梁景  
獻爲太尉

二年春正月辛亥祀南郊改以神元皇帝配東魏攻陷  
夏州二月儀同三司段敬討叛羌梁仙定平之三月以  
涼州刺史李叔仁爲司徒以司徒万俟壽樂干爲太宰  
夏五月司空越勒肱薨秦州刺史建中王万俟普撥及  
其子太宰壽樂干率所部奔東魏秋九月以扶風王孚  
爲司空以太保斛斯椿爲太傅冬十一月追改始祖神  
元皇帝爲太祖道武皇帝爲烈祖是歲關中大饑人相  
食死者十七八

三年春二月槐里獲神璽大赦夏四月太傅斛斯椿薨  
五月以廣陵王欣爲太宰賀拔勝爲太師六月以司空



扶風王孚爲太保以太尉梁景獻爲太傅以司徒廣平王贊爲大尉以開府儀同三司王盟爲司空冬十月安定公宇文泰大破東魏軍於沙苑拜泰柱國大將軍十二月司徒李叔仁自梁州通使於東魏建昌太守賀蘭植攻斬之

四年春正月辛酉拜天於清暉室終帝世遂爲常二月東魏攻陷南汾潁豫廣四州廢皇后乙氏三月立蠕蠕女郁久閭氏爲皇后大赦以司空王盟爲司徒秋七月東魏將侯景等圍洛陽帝與安定公宇文泰東伐九月車駕至自東伐以撫軍將軍梁仙定爲南洮州刺史安

### 西蕃

五年春二月赦京城內夏五月以開府儀同三司李弼爲司空免妓樂雜役之徒皆從編戶秋七月詔自今恒以朔望親閱京師見禁囚徒以司空扶風王孚爲太尉冬十月於陽武門外縣鼓置紙筆以求得失

六年春正月庚戌朝羣臣自西遷至此禮樂始備太尉扶風王孚薨二月鑄五銖錢降罪人冬十一月太師念賢薨

七年春二月幽州刺史順陽王仲景以罪賜死三月夏州刺史劉平謀反大都督于謹討禽之秋九月詔班政



事之法六條冬十一月叛羗梁仙定徒黨屯於赤水城  
秦州刺史獨孤信擊平之尚書奏班十二條制十二月  
御憑雲觀引見諸王叙家人之禮手詔爲宗誠十條以  
賜之

八年春三月初置六軍夏四月鄯善王兄鄯朱那率衆  
內附秋八月以太尉王盟爲太保冬十月詔皇太子鎮  
河東十二月行幸華州起萬壽殿於沙苑北

九年春正月降罪人禁中外及從母兄弟姊妹爲婚閏  
月車駕至自華州二月東魏北豫州刺史高仲密據武  
牢內附以仲密爲侍中司徒封勃海郡公秋七月大赦

以太保王盟爲太傅以太尉廣平王贊爲司空冬十二  
月以司空李弼爲太尉

十年春正月甲子詔公卿已下每月上封事三條極言  
得失刺史二千石銅墨已上有讜言嘉謀勿有所諱夏  
五月太師賀拔勝薨秋七月更權衡度量

十一年夏五月太傅王盟薨詔諸鞠大辟獄皆命三公  
覆審然後加刑冬始築圓丘於城南封皇子儉

十二年春二月涼州刺史宇文仲和反秦州刺史獨孤  
信討平之三月鑄五銖錢夏五月詔女年不滿十三以  
上勿得以嫁秋九月東魏勃海王高歡攻玉壁晉州刺



史韋孝寬力戰禦之冬十二月歡燒營而退

十三年春正月開白渠以溉田二月詔自今應宮刑者直沒官勿刑亡奴婢應黥者止科亡罪以開府儀同三司若干惠爲司空東魏勃海王高歡薨其司徒侯景據潁川率河南六州內附授景太傅河南大行臺上谷郡公三月大赦夏五月以太傅侯景爲太將軍以開府儀同三司獨孤信爲大司馬晉王謹薨秋七月司空若干惠薨大將軍侯景據豫州叛封皇子寧爲趙王

十四年春正月赦潁豫廣北洛東荆襄等七州以開府儀同三司趙貴爲司空皇孫生大赦夏五月以安定公

宇文泰爲太師廣陵王欣爲太傅太尉李弼爲太宗伯前太尉趙貴爲大司寇以司空于謹爲大司空

十五年己巳五月侯景殺梁武帝初詔諸代人太和甲改姪者並令復舊六月東魏勃海王高澄攻陷潁川秋八月盜殺東魏勃海王高澄冬十二月封梁雍州刺史岳陽王簫簞爲梁王

十六年夏四月封皇子儒爲燕王公爲吳王五月東魏靜帝遜位于齊秋七月安定公宇文泰東伐至恒農齊師不出乃還九月大赦

十七年春三月庚戌帝崩于乾安殿時年四十五夏四



月庚辰葬於永陵上諡曰文皇帝帝性强果始爲太尉時侍中高隆之恃勃海王高歡之黨驕狎公卿因公會帝勸酒不飲怒而歐之罵曰鎮兵何敢尔也孝武以歡故免帝太尉歸第命羽林守衛月餘復位及歡將改葬其父朝廷追贈太師百僚會吊者盡拜帝獨不屈曰安有生三公而拜贈太師耶及躋大位權歸周室嘗登逍遙觀望嵯峨山因謂左右曰望此令人有脫屣之意若使朕年五十便委政儲宮尋山餌藥不能一日萬機也旣而大運未終竟保天祿云

廢帝諱欽文皇帝之長子也母曰乙皇后大統元年正月乙卯立爲皇太子十七年三月卽皇帝位是月梁邵陵王蕭綸侵安陸大將軍楊忠討禽之

元年冬十一月梁湘東王蕭繹討侯景禽之遣其舍人魏彥來告仍嗣位於江陵

二年秋八月大將軍尉遲迥尅成都劔南平冬十一月安定公宇文泰殺尚書元烈

三年春正月安定公宇文泰廢帝而立齊王廓帝自元烈之誅有怨言淮安王育廣平王贊等並垂泣諫帝不聽故及於辱

恭皇帝諱廓文皇之第四子也大統十四年封爲齊王



廢帝三年正月卽皇帝位改元

元年夏四月蠕蠕乙旃達官寇廣武五月柱國李弼追擊之斬首數千級收輜重而還冬十一月魏師滅梁戕梁元帝梁太尉王僧辯奉元帝子方智爲王承制居建業

二年秋七月梁太尉王僧辯納貞陽侯蕭明於齊奉以爲主梁王方智爲太子九月梁司空陳霸先殺僧辯廢蕭明復奉方智爲帝是歲梁廣州刺史王琳寇邊大將軍豆虜寧帥師討之

三年春正月丁丑初行周禮建六官以安定公宇文泰爲太師冢宰以柱國李弼爲大司徒趙貴爲太保大宗伯以尚書令獨孤信爲大司馬以于謹爲大司寇以侯莫陳崇爲大司空冬十月乙亥安定公宇文泰薨十二月庚子帝遜位於周

周閔帝元年正月封帝爲宋公尋殂

東魏孝靜皇帝諱善見清河文宣王亶之世子也母曰胡妃永熙三年八月拜開府儀同三司孝武帝旣入關勃海王高歡乃與百僚會議推帝以奉明帝之後時年

十一

天平元年冬十月景寅皇帝卽位于城東北大赦改元



庚午以大師趙郡王湛爲大司馬以司空咸陽王坦爲  
太尉以開府儀同三司高盛爲司徒以開府儀同三司  
高昂爲司空壬申享太廟景子車駕北遷于鄴詔勃海  
王高歡留後部分改司州爲洛州以尚書令元弼爲儀  
同三司洛州刺史鎮洛陽十一月兗州刺史樊子鵠南  
青州刺史大野拔據瑕丘反庚寅車駕至鄴居北城相  
州之廡改相州刺史爲司州牧魏郡太守爲魏尹徙鄴  
舊人西徑百里以居新遷人分鄴置臨漳縣以魏郡林  
慮廣平陽丘汲郡黎陽東濮陽清河廣宗等郡爲皇畿  
十二月丁卯燕郡王賀拔允薨庚午詔內外戒嚴自司

悉依舊章從容雅服不得以務衫從事景子進侍中封  
隆之等五人爲大使巡喻天下丁丑赦畿內閏月梁以  
元慶和爲魏王入據平瀨鄉孝武崩于長安初置四中  
郎將於礪石橋置東中蒲泉置西中濟北置南中洛水  
置北中

二年春正月乙亥兼尚書右僕射東南道行臺元晏討  
元慶和破走之二月壬午以太尉咸陽王坦爲太傅以  
司州牧西河王綜爲太尉己丑前南青州刺史大野拔  
斬樊子鵠以降兗州平戊戌梁司州刺史陳慶之寇豫  
州刺史堯雄擊走之三月辛酉以司徒高盛爲太尉以



司空高昂爲司徒濟陰王暉業爲司空勃海王高歡討  
平山胡劉蠡升辛未以旱故詔京邑及諸州郡縣收瘞  
骸骨是春高麗契丹並遣使朝貢夏四月前青州刺史  
侯梁反攻掠青齊癸未濟州刺史蔡雋討平之壬辰降  
京師見囚夏五月大旱勒城門殿門及省府寺署坊門  
澆人不簡王公無限日得雨乃止六月元慶和寇南頓  
豫州刺史堯雄大破之秋七月甲戌封汝南王悅孫綽  
爲琅耶王八月辛卯司空濟陰王暉業坐事免甲午發  
衆七萬六千人營新宮九月丁巳以開府儀同三司襄  
城王旭爲司空冬十月丁未梁柳仲禮寇荊州刺史王

元擊破之癸丑祀圓丘甲寅閭闔門災龍見并州人家  
井中十二月壬午車駕狩于鄴東甲午文武百官量事  
各給祿是歲西魏文帝大統元年也

三年春正月癸卯朔饗羣臣於前殿戊申詔百官舉士  
舉不稱才者兩免之二月丁未梁光州刺史郝樹以州  
內附丁酉加勃海王世子澄爲尚書令大行臺大都督  
三月甲寅以開府儀同三司華山王鷲爲大司馬丁卯  
陽夏太守盧公纂據郡南叛大都督元整破之夏四月  
丁酉昌樂王誕薨五月癸卯賜鰥寡孤獨貧窮者衣物  
各有差景辰以錄尚書事西河王恂爲司州牧戊辰太



尉高盛薨六月辛巳趙郡王譔薨秋七月庚子大赦梁  
夏州刺史田獨鞞潁川防城都督劉鸞慶並以州內  
附八月并肆涿建四州霜實大飢九月壬寅以定州刺  
史侯景兼尚書右僕射南道行臺節度諸軍南討景辰  
平陽人路季禮聚眾反辛酉御史中尉竇泰討平之冬  
十一月戊申詔遣使巡檢河北流移飢人侯景攻剋梁  
楚州獲刺史桓和十二月以并州刺史尉景爲太保辛  
未遣使者板假老人官百歲已下各有差壬申大司馬  
清河王亶薨癸未以太傅咸陽王坦爲太師是歲高麗  
勿吉並遣使朝貢

四年春正月以汝南王暹爲錄尚書事夏四月辛未遷  
七帝神主入新廟大赦內外百官普進一階先是滎陽  
人張儉等聚眾反於大駟山通西魏壬辰武衛將軍高  
元咸討破之六月己巳幸華林園理訟辛未詔尚書掩  
骼埋胔推錄囚徒壬午閭闔門災秋七月甲辰遣兼散  
騎常侍李楷聘於梁八月西魏剋陝州刺史李徽伯死  
之九月侍中元子思與其弟子華謀西入並賜死閏月  
乙丑衛將軍右光祿大夫蔣天樂謀反伏誅禁京師酤  
酒冬十月以咸陽王坦爲錄尚書事壬辰勃海王高歡  
西討敗于沙苑己酉西魏行臺宮景壽都督楊白駒寇



洛州大都督韓賢大破之西魏又遣其大行臺元季海  
大都督獨孤信逼洛州刺史廣陽王湛棄城歸闕季海  
信遂據金墉十一月景子以驃騎大將軍儀同三司万  
俟普爲太尉十二月甲寅梁人來聘河間人邢磨納范  
陽人盧仲禮等各聚衆反是歲高麗蠕蠕並遣使朝貢  
元象元年春正月辛酉朔日有蝕之有巨象自至碭郡  
陂中南兗州獲送于鄴丁卯大赦改元二月景辰遣兼  
散騎常侍鄭伯猷聘于梁夏四月庚寅曲赦畿內開酒  
禁六月壬辰帝幸華林都堂聽訟秋七月乙亥高麗遣  
使朝貢是夏山東大水蝦蟆鳴于樹上秋八月辛卯大

敗西魏于河陰九月大都督賀拔仁擊邢磨納盧仲禮  
等破平之冬十月梁人來聘十二月庚寅遣陸操聘于  
梁

興和元年春正月辛酉以尚書令孫騰爲司徒三月甲  
寅朔封常山郡王邵第二子曜爲陳郡王五月甲戌立  
皇后高氏乙亥大赦是月高麗遣使朝貢六月乙酉以  
尚書左僕射司馬子如爲山東黜陟大使尋爲東北道  
行臺差選勇士庚寅前潁川刺史奚思業爲河南大使簡  
發勇士丁酉梁人來聘戊申開府儀同三司汝陽王暹  
薨秋八月壬辰遣兼散騎常侍王元景聘于梁九月甲



子發畿內十萬人城鄴四十日罷辛未曲赦畿內死罪  
已下各有差冬十一月癸亥以新宮成大赦改元八十  
已上賜綾帽及杖七十旁無耆親及有疾廢者各賜粟  
帛築城之夫給復一年

二年春正月壬申以太保尉景爲太傅以驃騎大將軍  
開府儀同三司庫狄干爲太保丁丑徙御新宮大赦內  
外百官並進一階營構主將別優一階三月乙卯梁人  
來聘夏五月己酉西魏行臺宮延和陝州刺史宮元慶  
率戶內屬置之河北馬場振廩各有差壬子遣兼散騎  
常侍李象聘于梁閏月丁丑朔日有蝕之己丑封皇兄

景植爲宜陽王皇弟威爲清河王謙爲潁川王六月壬  
子大司馬華山王鷲薨冬十月丁未梁人來聘十二月  
乙卯遣兼散騎常侍崔長謙聘於梁是歲高麗蠕蠕勿  
吉並遣使朝貢

三年春二月甲辰阿至羅出吐拔那渾大率部來降三  
月乙酉梁州人公孫貴賓聚衆反自號天王陽夏鎮將  
討禽之夏四月戊申阿至羅國主副伏羅越君子去賓  
來降封爲高車王六月乙丑梁人來聘秋七月己卯宜  
陽王景植薨八月甲子遣兼散騎常侍李騫聘於梁先  
是詔羣官於麟趾閣議定新制冬十月甲寅班於天下



已巳發夫五萬人築漳濱堰三十五日罷癸亥車駕狩于西山十一月戊寅還宮景戌以開府儀同三司彭城王韶爲太尉以度支尚書胡僧敬爲司空是歲蠕蠕高麗勿吉國並遣使朝貢

四年春正月景辰梁人來聘夏四月景寅遣兼散騎常侍李繪聘于梁乙酉以侍中廣陽王湛爲太尉以尚書右僕射高隆之爲司徒以太尉彭城王韶爲錄尚書事丁亥太傅尉景坐事降爲驃騎大將軍開府儀同三司辛卯以太保庫狄于爲太傅以領軍將軍婁昭爲太司馬封祖裔爲尚書右僕射六月景申復前侍中樂良王

景植爲宜陽王皇弟威爲清河王謙爲潁川王六月壬子大司馬華山王鷲薨冬十月丁未梁人來聘十二月乙卯遣兼散騎常侍崔長謙聘於梁是歲高麗蠕蠕勿吉並遣使朝貢

三年春二月甲辰阿至羅出吐拔那渾大率部來降三月乙酉梁州人公孫貴賓聚衆反自號天王陽夏鎮將討禽之夏四月戊申阿至羅國主副伏羅越君子去賓來降封爲高車王六月乙丑梁人來聘秋七月己卯宜陽王景植薨八月甲子遣兼散騎常侍李騫聘於梁先是詔羣官於麟趾閣議定新制冬十月甲寅班於天下



已巳發夫五萬人築漳濱堰三十五日罷癸亥車駕狩于西山十一月戊寅還宮景戌以開府儀同三司彭城王韶爲太尉以度支尚書胡僧敬爲司空是歲蠕蠕高麗勿吉國並遣使朝貢

四年春正月景辰梁人來聘夏四月景寅遣兼散騎常侍李繪聘于梁乙酉以侍中廣陽王湛爲太尉以尚書右僕射高隆之爲司徒以太尉彭城王韶爲錄尚書事丁亥太傅尉景坐事降爲驃騎大將軍開府儀同三司辛卯以太保庫狄于爲太傅以領軍將軍婁昭爲大司馬封祖裔爲尚書右僕射六月景申復前侍中樂良王

忠爵丁酉復陳留王景皓常山王紹宗高密王永業爵秋八月庚戌以開府儀同三司吏部尚書侯景爲兼尚書僕射河南行臺隨機討防冬十月甲寅梁人來聘十一月壬午驃騎大將軍開府儀同三司青州刺史西河王棕薨十二月辛亥使兼散騎常侍陽裴使于梁是歲蠕蠕高麗吐谷渾並遣使朝貢

武定元年春正月壬戌朔大赦改元己巳車駕蒐于邯鄲之西山癸酉還宮二月壬申北豫州刺史高仲密據武牢西叛三月景午帝親納訟戊申勃海王高歡大敗西魏師于邛山追奔至恒農而還豫洛二州平夏四月



封彭城王韶弟襲爲武安王五月壬辰以剋復武牢降天下死罪已下囚乙未以吏部尚書侯景爲司空六月乙亥梁人來聘戊寅封前員外散騎侍郎元長春爲南郡王八月乙丑以汾州刺史斛律金爲大司馬壬午遣兼散騎常侍李渾聘于梁冬十一月甲午車駕狩于西山乙巳還宮是歲吐谷渾高麗蠕蠕並遣使朝貢

二年春二月丁卯徐州人劉烏黑聚衆反遣行臺慕容紹宗討平之三月梁人來聘以旱故宥死罪已下囚景午以開府儀同三司孫騰爲太保壬子以勃海王世子高澄爲大將軍領中書監元弼爲錄尚書事以尚書左

僕射司馬子如爲尚書令以太原公高洋爲左僕射夏五月甲午遣散騎常侍魏季景聘于梁丁酉太尉廣陽王湛薨秋八月癸酉尚書令司馬子如坐事免九月甲申以開府儀同三司濟陰王暉業爲太尉太師咸陽王坦坐事免以王還第冬十月丁巳太保孫騰大司馬高隆之各爲括戶大使凡獲逃戶六十餘萬十一月西河地陷有火出甲申以司徒高隆之爲尚書令以前大司馬婁昭爲司徒庚子祀圓丘辛丑梁人來聘是歲吐谷渾地豆干室韋高麗蠕蠕勿吉等並遣使朝貢

三年春正月景申遣兼散騎常侍李獎聘于梁二月庚



申吐谷渾國奉其從妹以備後庭納爲容華嬪夏五月  
甲辰大赦秋七月庚子梁人來聘冬十月遣中書舍人  
尉瑾聘于梁十二月以司空侯景爲司徒以中書令韓  
軌爲司空戊子以太保孫騰爲錄尚書事是歲高麗吐  
谷渾蠕蠕並遣使朝貢

四年夏五月壬寅梁人來聘六月庚子以司徒侯景爲  
河南大行臺應機討防秋七月壬寅遣兼散騎常侍元  
廓聘于梁八月移洛陽漢魏石經于鄴是歲室韋勿吉  
地豆于高麗蠕蠕並遣使朝貢

五年春正月巳亥朔日有蝕之景午勃海王高歡薨辛

亥司徒侯景降于西魏以求救西魏遣其將李弼王思  
政赴之思政等入據潁川景乃出走豫州乙丑梁人來  
聘二月侯景復背西魏歸梁夏四月壬申大將軍高澄  
來朝甲午遣兼散騎常侍李緯聘於梁五月丁酉朔大  
赦戊戌以尚書右僕射襄城王旭爲太尉甲辰以太原  
公高洋爲尚書令領中書監以青州刺史尉景爲大司  
馬以開府儀同三司庫狄干爲太師以錄尚書事孫騰  
爲太傅以汾州刺史賀拔仁爲太保以司空韓軌爲司  
徒以領軍將軍可朱渾道元爲司空以司徒高隆之錄  
尚書事以徐州刺史慕容紹宗爲尚書左僕射高陽王



斌爲右僕射戊午大司馬尉景薨六月乙酉帝爲勃海王舉哀於東堂服總衰秋九月辛丑梁貞陽侯蕭明寇徐州堰泗水於寒山灌彭城以應侯景冬十一月乙酉以尚書左僕射慕容紹宗爲東南道行臺與大都督高岳潘相樂大破禽之及其二子瑀道十二月乙亥蕭明至帝御閭闔門讓而宥之岳等迴師討侯景是歲高麗勿吉並遣使朝貢

六年春正月己亥大都督高岳等於渦陽大破侯景俘斬五萬餘人其餘溺死於渦水水爲不流景走淮南二月己卯梁遣使求和許之三月癸巳以太尉襄城王旭爲大司馬以開府儀同三司高岳爲太尉辛亥以冬春亢旱赦罪人各有差夏四月甲子吏部令史張永 and 青州人崔閻等僞假人官事覺糺檢首者六萬餘人甲戌太尉高岳司徒韓軌大都督劉豐等討王思政於潁川引洧水灌其城九月乙酉梁人來聘冬十月戊申侯景濟江推梁臨賀王正德爲主以攻建業是歲高麗室韋蠕蠕吐谷渾並遣使朝貢

七年春正月戊辰梁北徐州刺史中山侯蕭正表以鎮內附封蘭陵郡公吳郡王三月丁卯侯景剋建業夏五月景辰侯景殺梁武帝戊寅勃海王高澄帥師赴潁川



六月剋之獲西魏大將軍王思政等秋八月辛卯立皇子長仁爲太子盜殺勃海王高澄癸巳大赦內外百官並進二級甲午太原公高洋如晉陽冬十月癸未以開府儀同三司咸陽王坦爲太傅甲午以開府儀同三司潘相樂爲司空十二月甲辰吳郡王蕭正表薨己酉以并州刺史彭樂爲司徒是歲蠕蠕地豆干室葦高麗吐吐谷渾並遣使朝貢

八年春正月辛酉帝爲勃海王高澄舉哀於東堂戊辰詔太原公高洋嗣事徙封齊郡王甲戌地豆干契丹並遣使朝貢二月庚寅以尚書令高隆之爲太保三月庚

申進齊郡王高洋爵爲齊王夏四月乙巳蠕蠕遣使朝

貢五月甲寅詔齊王爲相國總百揆備九錫之禮以齊

國大妃爲王太后王妃爲王后景辰遜帝位於齊

天保元年己未封帝爲中山王邑一萬戶上書不稱臣

谷不稱詔載天子旌旗行魏正朔乘五時副車封王諸

子爲縣公邑各一千戶奉絹一萬疋錢一萬貫粟二萬

石奴婢三百人水碾一具田百頃園一所於中山國立

魏宗廟

二年十二月己酉中山王殂時年二十八

三年二月奉諡曰孝靜皇帝葬於鄴西漳北其後發之



陵崩死者六十人帝好文美容儀力能挾石師子以踰  
墻射無不中嘉辰宴會多命羣臣賦詩從容沉雅有孝  
文風勃海王高澄嗣事甚忌焉以大將軍中兵叅軍崔  
季舒爲中書黃門侍郎令監察動靜小大皆令季舒知  
澄與季舒書曰癡人復何似癡勢小差未帝嘗與獵於  
鄴東馳逐如飛監衛都督烏那羅受工伐從後呼帝曰  
天子莫走馬大將軍怒澄嘗侍帝飲大舉觴曰臣澄勸  
陛下帝不悅曰自古無不亡之國朕亦何用此活澄怒  
曰朕朕狗脚朕澄使季舒毆帝三拳奮衣而出明日澄  
使季舒勞帝帝亦謝焉賜絹季舒未敢受以啓澄澄使

取一段帝束百足以與之曰亦一段爾帝不堪憂辱詠  
謝靈運詩曰韓亡子房奮秦帝魯連耻本自江海人志  
義動君子常侍侍講荀濟知帝意乃與華山王大器元  
瑾密謀於宮中僞爲山而作地道向北城至千秋門門  
者覺地下響動以告澄澄勒兵入宮曰陛下何意反耶  
臣父子功存社稷何負陛下耶及將殺諸妃嬪帝正色  
曰王自欲反何關於我我尚不惜身何況妃嬪澄下牀  
叩頭大啼謝罪於是酣飲夜又乃出居三日幽帝於舍  
章堂大器瑾等皆見烹於市及將禪位於文宣襄城王  
昶及司徒潘相樂侍中張亮黃門郎趙彥深等求入奏



事帝在昭陽殿見之相曰五行遞運有始有終齊王聖德欽明萬姓歸仰臣等昧死聞奏願陛下則堯禪舜帝便歛容荅曰此事推挹已久謹當遜避又云若尔須作詔書侍郎崔劼裴讓之奏云詔已作訖卽付楊愔進於帝凡十條書訖曰將安朕何所復若爲而去楊愔對曰在北城別有館宇還備法駕依常仗衛而去帝乃下御座步就東廊口詠范蔚宗後漢書贊云獻生不辰身播國屯終我四百求作虞賓所司奏請發帝曰古人念遺簪弊履欲與六宮別可乎高隆之曰今天下猶陛下之天下况在後宮乃與夫人嬪以下訣莫不欷歔掩涕嬪

趙國李氏誦陳思王詩云王其愛王體俱享黃髮期皇后已下皆哭直長趙德以故犢車一乘候於東上閣帝上車德超上車持帝帝肘之曰朕畏天順人授位相國何物奴敢逼人趙德尚不下及出雲龍門王公百僚衣冠拜辭帝曰今日不減常道鄉公漢獻帝衆皆悲愴高隆之泣灑遂入北城下司馬子如南宅及文宣行幸常以帝自隨帝后封大原公主常爲帝嘗食以護視焉競遇醜而崩

論曰莊帝運接交喪招納勤王雖時事孔棘而卒有四海猾逆剪除權強擅命神慮獨斷芒刺未除而天未忘



亂禍不旋踵自茲之後魏室土崩始則制屈強胡終乃  
權歸霸政主祭祀者不殊於寄坐遇黜辱者有甚於弈  
碁雖以節閔之明孝武之長祗以速是奔波文帝以剛  
強之質終以守雌自寶靜恭運終天祿高蹈唐虞各得  
其時也

北史卷五終



